

# Vate

Kovara Kulturi<sup>î</sup>

Dewreyê dîyine, hûmare: 7 (27)

Payîz 2006

## Serredaktor

Malmîsanij

## Wayîr û Mudirê Karê Nuşteyan o Berpirsiyar

(Sabibi ve Sorumlu Yazışları Müdürü)

Deniz Gündüz

### Redaksiyon

J. İhsan Espar,  
Malmîsanij, Mehmet Uzun

### Têkiliya Almanya

Munzur Çem  
Faks: +49 - 30 - 611 33 19

### Seba aboneyîye (Almanya de)

Vate  
Postfach: 30 21 07  
10 752 Berlin/Almanya

### Têkiliya Hollanda

Sukrî Atîk  
Poelenburg 30  
30 85 KT

Rotterdam/HOLLAND

### Têkiliya Swêdi

Eksätravägen, 186  
S-127 61 Skärholmen/SWEDEN  
E-mail: espar@bredband.net

### Têkiliya Norveçî

M. Darrêz  
Munkegt. 2  
0656 OSLO /NORVEÇ

### Sertê aboneyîye

Welat	serrêk	6 aşmî
Tirkîya:	16 YTL	8 YTL
Almanya:	20 Euro	10 Euro
Swêd:	250 SEK	125 SEK
Welatê bînî:	40 Euro	20 Euro

Vayî: 3 YTL/5 Euro

### İlan

Rîpelêk: 60 YTL/100 Euro  
Nêmîpel: 30 YTL/50 Euro  
Çarêgîpel: 15 YTL/25 Euro

**Çap/Baskı:** Berdan Matbaacılık

### Adres:

Vate  
Katip Mustafa Çelebi Mah.  
Tel Sok. No: 18, Kat: 3  
Beyoğlu/İSTANBUL  
Tel: (0212) 244 94 14  
e-mail: butkan@mynet.com

Üç aylık süreli yaygın dergi

Berpirsiyariya her nuşteyî ya nuştoxi/nuştoxe bi xo ya.

## TEDEYÎ

Wendoxan rê .....	3
<b>J. İhsan Espar</b> , Konferansê Kirmankî û Hewramkî .....	4
<b>Wayîrê Weşanxaneyê Dozî</b> : “Ma Vanîme... Ma Îna rê mîras Verdîme” .....	10
<b>Newzat Gedîk</b> , Lawo Lawo Hemdî! .....	27
<b>Deniz Gunduz</b> : “Eke Îmkanî Bibîyêne . . .” .....	29
<b>W. K. Merdimîn</b> , Remayeyê Hela Teng .....	36
Weşanxaneyê Bîrî ra .....	37
<b>Siyamend Mîrvanî</b> , Sîmserkîs Deway Min a .....	48
<b>Roşan Lezgîn</b> , Anton Çexovê Ma û . . . .....	49
<b>Huseyîn Burke</b> , Luyî û Her .....	55
<b>Mehmûd Nêşite</b> , Werêameyîşê Marê Qolî .....	58
<b>Ercan Sarıçîcek</b> , Vaje .....	61
<b>Akman Gedîk</b> , Astareyê Daye Rûyê Asmêni de Nêmêndo .....	62
<b>Yekta H. Okçu</b> , Tembelî û Passîfi Çiyê Holî Nîyê .....	65
<b>Seyîdxan Kurij</b> , Rencber Ezîz .....	72
<b>Heydo Keçanic</b> , Bibo Zê Verî .....	80
<b>Hebûn Okçu</b> , Nêzanayîşê Asnawê .....	82
<b>Newzat Valêri</b> , Xwi Zûneyîş .....	84
<b>Serdar Roşan</b> , Hikayetêke Şêx Sedî .....	85
<b>Deniz Gunduz</b> , Omid Esto, Hêvî Esta .....	88
<b>M. Mîrzanî</b> , Hal .....	89
<b>Deniz Gunduz</b> , Edebiyatê Ma Vile Dano .....	90
<b>Îrfan Kaya</b> , Rîpelê Fiqrayan .....	92
Wendoxan ra .....	94

## WENDOXAN RÊ

Wendoxê delalî,

Çapbîyayîşê na hûmara ma ra ver, Grûba Xebate ya Vateyî, Kurdistanê Başûrî de beşdarê konferansêkê tarîxî, Konferansê Kîrmancî (Zazakî) û Hewramkî (Gorankî) bîye. Na hûmare de nê konferansî ser o agahdarî estê.

Weşanxaneyê Vateyî emser amnan û payîzî çendna kitabê neweyî vetî. Sey **Omid Esto** yê Huseyîn Karakaşî û **Kîrmanceca/Zazaca Dil Dersleri** yê Deniz Gunduzî. No weşanxane, bi kitabanê xo yê neweyan ziwan û kulturê ma rê xizmeto muhîm keno.

Ma çend hûmaranê bînan de zî nuşt ke ma ehemîyetêk xususî danê wendox û nuştoxanê hepsîyan. Heta ke îmkanê ma dest danê ma înan rê kovar û kitabanê xo şawenî (rusnenî). Hepisxaneyan ra zî ma rê nuşte û mektubê ke ser o damxaya “görülmüşdür”î esta yenê. No demeyêk o ke hepisxaneyan ra ma rê mektub û faksê tirkî yenê. Sey yê nînan:

Ehmed Osman (Entab), Huseyîn Karakaş (Kocaelî), Îsmaîl Olmez (Entab), Murad Canşad (Edîrne), Orhan Bingol (Kocaelî), Refîq Sunkur (Kocaelî), Serdar Guzelçay (Elbîstan), Seyîthan Akdenîz (Sêrt), Sînan Sutpak (Elbîstan).


Îdarekerdoxê hepisxaneyanê kolonyalîstan nêverdanê ke hepsiyê kurdî mektuban û nuşteyanê xo yê kurdkiyan bişawî teber. Na neheqî û teda dewlete zî “demokrasî”yê aye û sanika “demokratîk cumhuriyet”î musnena!

Wendox û nuştoxê ma, kovare ma de kêmîbiyayîşê rexneyan (krîtîkan) ra gerre (şîkayet) kenî. Ma nê rexneyanê înan qebul kenî. Raste vanî, bê rexne edebîyat û îlm aver nêşino. Ma hêvî kenî ke no ware de zî tayê gamî bêrîn eştene.

Weşî û şayî de bimanîn.

Vate

## KONFERANSÊ KIRMANCKÎ Û HEWRAMKÎ



J. İhsan ESPAR

Kombîyayışê 13. yê Grûba Xebate ya Vateyî de qerar amebi girewtiş ke eke îmkan bibo, kombîyayışê 14. Kurdistanê Başûrî de bibo. Fikrê “Konferansê Kirmanckî (Zazakî) û Hewramkî (Gorankî)”, demeyo ke Grûbe babeta kombîyayışî wezîrê kulturî yê Kurdistanê Başûrî reyra qisey kerde vejîya meydan. No konferans hîna vêşî pêşnîyaza wezîrê kulturî bi. Verê qerar o bi ke konferans aşma nîsane 2006 de bibo labelê

dima 20-21ê aşma teşrîna 2006 de, Hewlêr de, salona Komeleya Nuştoxanê Kurdistanî de bi.

Grûba Xebate ya Vateyî ra, Ewropa ra, nê kesî besdarê konferansî bîy: Aydin Bîngol (Almanya), Haydar Otlu (Swêd), Huseyn Kulu (Almanya), J. İhsan Espar (Swêd), Lerzan Jandîl (Almanya), M. Malmîsanij (Swêd), Mehmet Selîm Uzun (Swêd), Mehmet Taş (Swêd), Munzur Çem (Almanya), Seyîdxan Kurij (Almanya), Wisif Kaymak (Fransa). Nê çar kesî zî Kurdistanê Bakurî ra besdar bîy: Ehmedê Dirihi, Mehmûd Nêşite, Roşan Lezgîn, Serdar Bedirxan.

Verê ke konferans dest pêbiko Grûba Xebate ya Vateyî, Hewlêr û Silêmanî de tayê dezgeyê sîyasî û kulturî zîyaret kerdî. 15ê aşma teşrîne de, Hewlêr de Korri Zanyarî Kurdistanî ame zîyaretkerdiş. Sereka Korri Zanyarî Kurdistanî, Kurdistan Mukriyanî derheqê dezgehê xo de agahdarî day Grûbe û hêvî kerd ke konferans serkewte bo. Dima, Grûbe Parlamentoyê Kurdistanî de cagirewtoxê serekê parlamentoyî Kemal



Grûba Xebate ya Vateyî abîdeya Helebçe ver de (Helebçe)

Kerkukî zîyaret kerd û hem kar û xebata xo ser o hem zî sebebê ameyîşê xo yê Kurdîstanî ser o agahdarî day ey. Kemal Kerkukî zî bi kilmîye derheqê rewşa siyasî ya Kurdîstanî de fîkrê xo vatî. Ey bi taybetî meseleyê Kerkukî de qerardarîya Hukmatê Mintiqaya Kurdîstanî eškere kerde. Goreyê Kemal Kerkukî, eke meseleyê Kerkukî -seke ser o ameyo pêkerdiş- goreyê maddeya 140. ya qanûnê bingeyî yê Îraqî, heta peynîya serra 2007î hal nêbo, qanûnê bingeyî yê Îraqî yo ewroyin bêhukm maneno. Xora eke qanûnê bingeyî bêhukm bibo, hem têkiliyê Kurdîstanî û Îraqî têreyra nêmanenê hem zî Îraq se dewlete orte ra wedarıyêno.

A roje Komeleya Nuştovanê Kurdîstanî zî amey zîyaretkerdiş û derheqê Grûba Xebate ya Vateyî de agahdarî amey dayîş. Têkiliyanê lehçeyanê ziwanê kurdki ser o û rewşa kurmanckîya Kurdîstanê Başûrî ser o ame qiseykerdiş. Grûbe ra çend kesan, Hewlêr de, yew mektebo ke tena seba gedeyanê (domananê) şehîdanê Kurdîstanî ameyo texsîskerdiş zîyaret kerd. Nê kesan, seba ke form û muhtewaya perwerdeyê Kurdîstanî ser o bibî wayirê fîkrêk, telebeyan, mamostayan û idarekerdoxanê mektebî reyra sohbet kerd.

17ê aşma teşrîne de Grûbe, Koye, Dokan û Silêmanî ser ra şîye Helebçe. Helebçe de, Dayîreyê Wezaretê Kulturî de, çend nuştovanê

hewramîyan û endamanê Grûbe yewbînan nas kerd. Dima, Grûbe şîye abîdeya şehîdanê Helebçe ser. Merasîmê yadkerdişî û hurmetkerdişê şehîdan ra pey Grûbe nahîyeya Xurmale ser ra hetanî Bîyare şîy. Bîyare,



Wezîrê Kulturî Felekeddîn Kakeyî (vernî de, destê rasî ra kesê dîyine),  
Hêro Îbrahîm Ehmed Xanime, Xecê Xanime û  
Grûba Xebate ya Vateyî konferans de (Hewlêr)

mintiqaya Hewramanê Kurdîstanê Başûrî de, di merkezanê Hewramanî ra yew a û nêzdî 500 keyeyî esta. Grûbe yew deme Bîyare de vinderte û şarî de qisey kerd. Şan de Grûbe agêray Silêmanî û Motelî Beheştî Şarî de mende. Uca de Xecê Xanime (Hatice Yaşar) Grûbe zîyaret kerde.

Grûba Xebate ya Vateyî, 18ê aşma tesrîne de Kitabxaneyê Pêroyî yê Silêmanî zîyaret kerd. Nê kitabxaneyî bi tertîb û nîzamê xo gelek bala zîyaretkerdoxan ante.

Emnî Sûr ê Silêmanî, îşkencexaneyê beesîyan ê gonîweran bi. Hukmatê Kurdîstanî nika na bîna kerda muzeyêk. Xebata restorasyonî hema dewam kena labelê Grûbe demeyêko derg û dila nê îşkencexaneyî mîyan ra gêray. Wezîfedaranê nê muzeyê balkêşî, metodanê îşkenceyî û sîstemê zulmê Emnî Sûrî ser o gelek agahdarî day.

Grûbe, Silêmanî de televîzyonê Kurd-Satî zî zîyaret kerd. Tîya de, berpirsiyara nê televîzyonî Hêro Îbrahîm Ehmed Xanime (cinîya serekkomarê Îraqî Celal Telabanî), seba bixeyrameyîşî amey grûbe dîye

û eleqedar bîye. Gêrayîşê studyoyanê televîzyonî ra pey, şan de, Grûbe ver bi Hewlêr ray mende.

Hewlêr de, Grûba Xebate ya Vateyî, hem hetê mesûlanê PDK-Bakur û hem zî PSK ra amey zîyaretkerdiş. Nê her di partîyanê Kurdistanê Bakûrî, cîya-cîya Grûbe dawetê şamî kerde û xebata aye rê piştîdayîş xo beyan kerd.

Konferansê Kirmankî û Hewramkî, 20ê aşma teşrîna 2006, saete 10.00 de, Hewlêr de, salona Komeleya Nuştoxanê Kurdistanî de dest pêkerd. Destpêkerdişê konferansî de, wezîrê kulturî Felekeddin Kakeyî, Hêro Îbrahîm Ehmed, walîyê Hewlêrî Newzad Hadî, Xecê Xanime, Kurdistanê Başûrî û Bakûrî ra gelek nuştox, rojnamenuştox (gazeteci), kesê siyasi û wezîfedarê televîzyon û radyoyan amade bîy. Konferansî bi qiseykerdişê birêz Felekeddin Kakeyî dest bi xebata xo kerd. Kakeyî qisekerdişê xo de da zanayîş ke reya verîn a paytextê Kurdistanê azadî



Emnî Sûr (Silêmanî de, îskencexaneyê beesîyanê Îraqî)

de konferansêko inasarên (winasî) virazîyêno û hêvî kerd ke no bibo destpêkêk baş. Ey, behsê ehemîyetê xebata ke lehçeyanê kurdkî ser o bena kerd û lehçeya hewramkî ser o vindert. Qiseykerdoxo dîyin Grûba Xebate ya Vateyî ra Munzur Çem bi. Çemî, qiseykerdişê xo de bi kilmîye

hetê tarîxî, cografi, dînî û ziwanî ra kirmancî (zazayî) day şinasnayîş. Ey ra pey Mihemed Emîn Hewramanî qisey kerd û tarîxê ziwanî, têkiliya ziwanî û bawerîyan ser o vindert.

Cagirewtoxê serekwezirê Hukmatê Kurdistanî Umer Fettahî, Grûba Xebate ya Vateyî, Hêro Îbrahîm Ehmed û wezîrê rewşenbîrî Felekeddîn Kakeyî bînaya serekwezîriye de dawetê perojîye (taştî) kerdî. Werdî ra ver Umer Fettahî qisey kerd û va ke o gelek qîymet dano xebatanê inasarênan, nê konferansî no ware de sey gamêka muhîme vîneno, coka



Grûba Xebate ya Vateyî, Hêro Îbrahîm Ehmed Xanime, Xecê Xanime,  
Mudirê Kurd-Satî û Wezaretê Kulturî ra di embazê hewramî  
berê bînaya Kurd-Satî ver de (Silêmani)

zî bi zerrîweşîye piştîya na xebate gêno.

Perojîye dima Malmîsanijî edebîyatê kirmankî ser o qisey kerd. O, verê ke dest bi babeta xo biko, xebata ilmî de objektîfiya cigêrayoxan ser o vindert. Va ganî cigêrayoxî meseleyanê zerrîwaştişî û rastîye yewbînan ra ciya bikê. Dima behsê nuştişê kirmankî û kitabanê kirmankî kerd. Kalîte û babetanê nê kitaban ser o fikrê xo va. Ey dima Dr. Enwer Qadir Mihemed lîrîka gorankî ser o vindert.

21ê aşme de M. Selîm Uzunî xebata standardkerdişê kirmankî ser o qisey kerd. O, verê, muhtewaya standardkerdişê ziwanî ser o vindert; dima behsê karê Grûba Xebate ya Vateyî ya seba standardkerdişê

kirmanckî kerd.

Eynî roje Cemal Bêdarî babeta “hewramkî de nêr û makiye” ser o qisey kerd.

Mi persa alfabeşa kurdkî ya bi herfanê latînkî ser o qisey kerd û bi kîlmîye alfabeşa bi herfanê latînkî daye şinasnayış. Ez ehemîyetê alfabeşa fonetikî ser o vinderta û mi da zanayîş ke alfabeşa kurdkî ya bi herfanê latinkî ewro gureyê kurdan vînena labelê rastnuştiş de problemî estê. Peynî de, Hekîm Mela Salihî tayê çekuyê kirmanckî-sorankî-hewramkî muqayese kerdî.

Medyaya Kurdistânê Başûrî zaf ca da nê konferansî. Televîzyon û rojnameyan, di rojî gelek behsê konferansî, lehçeyanê hewramkî û kirmanckî kerd. Wezîrê kultûrî Felekeddin Kakeyî, di rojî vernî ra heta peynî konferans de amade bi û beşdarê munaqeşeyan bi. No helwêstê ey hetê beşdaranê konferansî ra zaf ame teqdîrkerdiş. Nê konferansî de kurdanê hewramîyan û kirmancan yewbînan dîy û nas kerd. Qiseykerdoxê her di lehçeyan, derheqê yewbînan de bîy wayîrê agahdarî. Heme beşdarê konferansî hemfîr bîy ke nê xebatî ganî dewam bikê.




Wezîrê Kultûrî Felekeddin Kakeyî (destî çepî ra, pay ra kesê yewine), Xecê Xanime, Hêro Îbrahîm Ehmed Xanime (pay ra orte de), cagirewtoxê serekwezirê Hukmatê Kurdistanî Umer Fettah (destê rasî ra, pay ra rêza verêne de kesê dîyine) û Grûba Xebate ya Vateyî bînaya Serekwezîriye ver de (Hewlêr)

**Wayîrê Weşanxaneyê Dozî Alîriza Vural:**

**“MA VANÎME... MA ÍNA RÊ MÎRAS VERDÎME,  
RAYE BIMUSNÎME DÎNA.”**

Alîriza Vural



*Weşanxaneyê Dozî serrra 1990 de İstanbul de abi. Nê weşanxaneyî heta serra 2006î, 38 kitabê kurdkî û gelek kitabê tirkî yê derheqê kurdan de neşr kerdî. Wayîrê nê weşanxaneyî verê Ehmed Zekî Okçuoglu bi, nê serranê peyênan Alîriza Vural o. Mi 01.02.2006 de Alîriza Vuralî de roportaj kerd. Sîma cêr ra nê roportajî wanenî.*

***Malmîsanij***

-*Ti key maya xo ra bîyi?*

-Ez 1953 de, dewanê Gimjimî ra Bada de maya xo ra bîyo.

-*Wendîşê to çi yo?*

-Mi İstanbul Unîversîtesî de, Îqtîsad Fakultesî de wend.

-*To key dest bi karê weêanxaneyî kerd?*

-1990 de.

-*To karê nê weşanxaneyî ra ver çi kar kerdinî?*

-Ez nê karî ra ver çar-ponc serrî jû firma îxracatî de xebetîyo. Aye ra

ver ez profesyonel devrîmcî bîyo.

-*To çend serrî şorişgêrîye, yanî dewrîmcîyîye kerde?*

-Nêzdî vîst serre. Yanî serranê hewtay ra hetanî neway.

-*Ti qet hepissxane de mendî?*

-Hîrê serrî. Heştay (1980) ra heta heştay û hîrê (1983).

-*Cica de?*

-Ez Îstanbul de kewto ci, Ulus ra jî vejîyo. Ulus qeza Zonguldaxî (Zonguldak) ya, ma îja (uca) ra tahliye kerdîme.

-*Ti kamcîn dewa ra dekewtî hepissxane?*

-Dewa (dawa) troçkîstîye bîye, yanî dewa Îşçî Cephesî.

-*Weşanxaneyê Dozî key abi?*

-1990 de.

-*Yeno vîrê to wexto ke şima no weşanxane akerd, şima hetê resmîyetî û formalîteyan ra se kerd, şima ra ci waşt?*

-Resmî çîye nêwazenê. È ma resmî şîrket o. To şîrket kena ya (akena), ewraqê şîrketî ci bî, îna wazenê. Nufus cuzdan suretî, îqametgah senedî.

-*Emnîyet ra zî çiyê wazenî?*


-A çax emnîyet ra çiyê nêwaştêne. Wexto ke to kovare veja emnîyet ra wazenê.

-*Resmîyet de wayîrê weşanxaneyî kam o?*

-A çax Ehmed Zekî Okçuoglu bî, na hîrê serrî yo ez o.

-*Kitabanê kurdkîyan ê Weşanxaneyê Dozî ra, êyê ke ameyê qedexekerdiş (yasaxkerdiş) yan zî pêserkerdiş (toplatalmış) estê?*

-Kitabanê ma yê kurdkîyan ra di kitabî yasax kerdî:





“Danezana Gerdûnî ya Mafêن Mirov” û “Li Kurdistanê û Rojhilata Navîn Çekêن Kîmyayî-Biyolojîkî û Atomî” (1992).

-Derheqê nê kitaban de qerarê mehkumîyetî dayo?

-Nê, qerarê mehkumîyetî çin o. Derheqê nînan de dewa nêkerdibî ya. Kitabî top kerdirbî, dewa nêkerdibî ya.

-Baş o, wexto ke dewa anêbo (nêbo ya) nê kitabî se benî?

-Ma defêna (reyna) nê kitabî kerdî vila. Ama bêqanûn bî, qanûnî nêbî.

-Mavajî kitabêk se rîpel bibo, mesrefê çapa ey çend beno?

-Heqê matbaa û kaxite teqrîben 600-700 YTL beno.

-Şima bi xo kaxite herînenî (erînenî) yan çapxane herîneno?

-Kaxite ma bi xo herînenîme. Eke mordem biwazo matbaa jî herînena ama ê ma, ma bi xo herînenîme. Wexto ke mordem bi xo biherîno deha erzan mal beno.

-Kitabanê ke şima neşr kenî, şima înan ra danî nuştoxî?

-Ma danîme.

-Şima nuştoxî de bazar kenî? Şima çend kitabî dayî ey/aye?

-Nê, ma hata nika bazar nêkerdo. Vurîno; sed, di sed, çıqa ke waşt ma danîme ci.

-Nuştox şima ra çiyê nêwazeno? Merdim esto wişk bazar keno, şima rastê nuştoxê winasî nêamey?

-Nê.

-Şima her kitabî ra nêzdî çend teneyî (hebî) çap kenî?

-Teqrîben hezar.

-*Nînan ra çend teneyî bi peran yenî rotene?*

-Her kitabî ra sed-sed û poncas teneyî ançax ênê rotiş. Kitabo ke zaf bêro rotene di sed teneyî êno rotene. Kitabê zey “Dilbilgisi”, “Kolay Kürtçe” hîna zaf ênê rotene.

Ma kitabanê kurdkî hîna erzan roşenîme ke bêrê wendiş. Mesela fiyatê kitabê tirkî ke des paxnotî bibo, kitabê kurdkî çar-ponc paxnotî fiyat nanîme piro ke mîlet biwanone ama oncîya jî nênenê rotene.

-*Rotiş ra teber zî şima kitaban belaş vila kenî? Mavajî se protokol filan?*

-Protokol danîme, belaş danîme. Texmînen sed-sed û poncas heban jî ma hinî (winî) danîme.



-*Şima ser ra heqê posteyî zî danî?*

-Nê, ma heqê posteyî nêdanîme, ma dest ra danîme. Dernega rê ruşnenîme. Cezaevî ra zaf wazenê, ma îna rê ruşnenîme. Her roj ponc-şes peyayî (merdimî) ênê buroyê ma, ma zîyaret kenê; ma kitab danîme ci, tenê (tayê) pera danê tenê jî nêdanê.

-*Hîna (deha) zaf kamcîn hepisxane ra kitaban wazenî?*

-Kulîne (hemîne) ra, her hepisxane ra jî wazenê.

-*Şima înan ra peran gênî?*

-Nê, ma îna ra nêcênîme (nêgêni).

-*Heqê posteyî vay o?*

-Nê. Ama hepisxaneyî zêde yê, aye ra zaf beno giran. Mesela jû hepisxane bibo giran nîyo ama hepisxaneyî zaf ê, aye ra beno giran.

-*Şima seba rotişi kitaban şawenî (ruşnenî) teber, yanî teberê Tirkîya?*

-Ma çend dolimî (donimî) Almanya rê, Fransa rê, Îsveçî rê ruşnay ama pereyê ci nîyamê?

-*Şima kamî rê şawitî? Înan waştî yan şima xovero şawitî?*

-Ma derneganê kurda rê ruşnay. Dîna (înan) jî waştî, ma jî ruşnay.

-*Qey peranê şima nêdanî? Se vanî?*

-Peygoş kenê. Mesela par Îsveç ra kurdan siparîş da ma, ma ci rê teqwîmê kurdkî viraşt û ruşna, perê ma nêruşnay. Dîna waştibî, ma ruşna, heqê neqlîyaya ma jî nêda.

-*Şima Îsveç ra kamî rê şawit?*

-Ma Komela Cinîya rê ruşnay, Federesyonî rê ruşnay. Siparîşê xo da ma, ma jî teqwîmê dîna viraşt. Perê ma nêruşnay. Ma va, ma qayît kerd (ewnîyay) ke ci ra çiyê nêvejîya ma jî fek ci ra verda ra (verada).

Verde (verê) Tirkîya de vila kerdene zore bîye, ma hevalanê xo rê ruşnêne; vila kerdêne, îna jî perê nêruşnêne. Nika Tirkîya de ma kitabçîya rê ruşnenîme, ma danîme “daxitim”. Ma êndî nêruşnenîme teber.



-*Şima 1990 ra nat nê karî kenî. Verê, mavajî serranê 1990 de, wexto ke şima kitabê kurdkî şawitînî teber, postexane de problem vejîyaynî?*

-Postexane de, goreyê memurî vurîyêne. Memur bî ke vatêne “No kurdkî yo, ez nêruşneno”, memur jî bî ke goş nêkotêne ci, ruşnêne.

-*Nika senîn o?*

-Nika qayîtê ci nêkenê (nêewnêni), goş nêdanê ci; ci ruşnena biruşne, şono.

-*Kitabê ke şima bê xebera wayîrê heqê telîfi neşr kerdê estê?*

-Nê, ma çîyo henên nêkenîme. Kitabo ke weşanxaneyanê kurdan neşr kerdo ma ê kitabî jî neşr nêkenîme.

-*Sewbîna weşanxaneyî estê ke neşr kenî? Ti pêhesîyayî?*

-Tey (tayê) estê. Ez pêhesîyay.



-*Ti nê karê ïnan senî vînenî?*

-Ez rind nêvîneno. Dizdîye senêñ a, a jî henêñ a.

-*Şima qet heqê telîfî dayo kesî?*

-Nê, pere olaraq ma heqê telîfî nêdo kesî. Ama kitab olaraq danîme.

-*Ê nêwazenî yan şima nêdanî?*

-Ne ïna waşto ne jî ma do.

-*Çirê şima nêdanî? Normal de ganî weşanxane heqê telîfî nêdo?*

-Ey durumê ma jî rind nîyo. Kitabî nîyênenê rotış, mesrefê xo nêvejenê. Xora nîyetê ma ma vanîme însan bi kurdkî biwanone, bimusone. Ma jî fedakarî kenîme nuştoxî jî fedakarî kenê.

-*Gelo kitabanê ke şima danî nuştoxan, benî roşenî?*

-Nê, ez texmîn nêkeno. Danê hevalanê xo, nas û dostanê xo. Peyayê ke bi kurdkî nivîsnenê, sevtanê (seba) pera ra nênivîsnenê; aşiqê kulturê xo yê, coka nivîsnenê.

-*Kitabanê şima yê kurdkîyan ra çend teneyî carnaye (tercume) yê û kamcîn ziwan ra ameyê carnayış (tercumekerdîş)?*

-Ponc-şeş tene yê. Tirkî, îngilizkî û franskî ra tercume bîyê.

-*Baş o, kesanê ke nê kitabî carnayî, şima heqê carnayışî dayo ïnan.*

-Nê, ïna jî pere nêgureto. Belaş tercume kerde.

-*Labelê na keda ïnan a, emegê ïnan o.*

-Tabî, ma jî zanîme emeg o. Ma nêşkînîme pera bidîme, ma sadece kitab danîme ci.

-*Kesê ke karê carnayışê kurdkî kenî, tena nê karî kenî yan karêko bîn zî kenî?*

## *Vate* \_\_\_\_\_

-Karo bîn kenê. Tercumanîye zî ver ra kenê, sevtanê xizmetê kulturi kenê.

-*Şima kitabanê xo senî danî naskerdiş?*

-Mesela ma dolim-dolim, yanî şop-şop ûlan danîme gazeteyan; sey Radikal, Milliyet, Hürriyetî. Ma ge-gane ûlanê jû kitabê xo ge-gane jî lîsta kitabanê xo danîme. Verde (verê) nê gazeteyan ûlanê kurdkî nêguretêne. Mesela naye ra ponc serrî ver nêguretêne. Nika ûlanê kurdkî jî vejînê.

-*Nê ke to behs kerd rojnameyê tirkan bî. Şima ûlan danî rojnameyanê kurdan jî?*

-Nika ûlan bi peran o, butçeya ma jî kemî ya; kamcî yayino ke zêde êno wendene, ma ûlan danîme dîna. Rojnameyê hetê PKK ûlanê ma nêcênê.

-*Şima qet ceribna?*

-Ma zaf cerebna feqet nêcênê.

-*Mesela kamcîn rojname?*

-Mesela Özgür Gündem. Mi ûlanê teqwîmê kurdkî da, nêguret!

-*Se va? Nêva sebeb çi yo?*

-Va “yayın kurulu uygun görmedi”.

-*Yanî rojnameyanê tirkan zî ûlanê şima qebul kerd, yê kurdan qebul nêkerd?*

-Heya (e), qebul nêkerd. Hetta ê ke sempatîzanê dîna yan jî mordemê dîna yê, nêverdanê ê ne kitabanê ma biwanê ne jî biroşê.

-*Sebeb?*

-Ez nêzano, dîna ra pers bike. Sebebê dîna nêzano.

-*Bê xebera şima, cayanê bînan de, mesela rojname yan zî televîzyon*

*de qet kesî kitabê şima day naskerdiş?*

-Nê, feqet dolimê televîzyonê tirkan programê Batmanî dêne, programê zonî, yanî “anadilde eğitim”î dêne, a çax çend kitabê ma verê dîna (înan) de bî. Qapaxê ci musnêne ama behs nêkerdêne.

*-Ti endamê Türk Yayıncılar Birliği yi?*

-Nê. Wexto ke îhtiyacîya ma pê bîye ma rê wayîr nêvejîyê, ez jî endam nêbîyo.

*-Ez zana ke problemê weşangêriya kurdkî zafî. Goreyê fîkrê to, hîrê problemê tewr (en) muhîmî çi yê?*

-Problemê vilakerdene esto. Mesela ma kitaban danîme “daxitim”, daxitimê tirkan o, ê kurda nîyo. Daxitimê tirkan jî kitaban ruşneno çend caya, defêna aşmê pey de top keno ano, vano nîyamê rotene. Ser o nêvindeno yanî.

Problemê mawo bîn, ma vanîme xwezila (werrekna) perê ma bibîyêne ma heqê nuştoxa bidêne. Ma wazenîme heqê telîfi bidîme.

Ma wazenîme hezar nê, hîrê-çar hezarî neşr bikîme. Nê kulî problem ê.

*-Şima no weşanxane senî akerd? Hetê maddî ra şima zehmetî nêdî?*

-Ma xerclixê xo top kerd, weşanxane hinî kerd ya. Xeylî wext, nêzdîyê des serra jî kek Ehmed [Ehmet Zekî Okçuoglu] şîyêne nas û dosta ra perê guretêne ardêne, karê weşanxaneyî hinî dewam kerdêne. Hinî nêbiyêne nêşîyêne.

*-Kesanê ke şima rê hetê maddî ra yardım kerdêne zaf bîy?*

-Peyayê-di peyayî bîy, zêde çin bîy.

*-Eke pereyê to bibîyêne, sey berpirsiyarê nê weşanxaneyî to waştêne se bikî?*

-Eke imkanê ma bibîyêne, mesela ma kovara kurdkî ya edebîyat û kultûrî vetêne. Ma kitabê domana û kitabê dersa bi kurdkî vetêne. Ma ferhengêde girs -ê lehçeyan pêro têmîya de- vetêne. Ma gazeta kurdkî

vetêne.

-To çirê no karê weşanxaneyî weçîna, no kar tercîh kerd?

-Nika verde jî, wexto ke ez Kawa de bîyo...

-Hela vinde, meselaya to derg a! Ti Kawa de zî xebitîyayî?

-Ez verê DDKDcî bîyo, aye ra tepîya bîyo Kawacî, aye ra tepîya jî bîyo troçkîst.

-Ti heta key DDKD de xebitîyayî?



-Serre nêna mi vîrî. Wexto ke Ehmed [Ehmet Zekî Okçuoglu] û Mahmudînan [Mahmut Çıkman] jûbîn ra abirîyay, a çax bî. Ez a çax leyê Ehmedî de mendo. Ma bî Kawacî.

Bado mi qayît kerd sosyal emperialîzm filan... Nêbî. Kitabê Troçkî kewtî mi dest, mi wendî; ez tesîrê îna de mendo, bîyo troçkîst. Ama ez oncîya kurd bîyo, ewk (neha, emin) nêbîyo.

-Mesele siyasetî kar ra abî, karê weşanxaneyî.

-Ha kar! Hevalêde mi bî, îxracatçı bî. Ez çend serrî şîyo leyê dey. Mi qayît kerd, mi rê weş nîyamêne. Miletê ma bindest bî, bêwayîr bî; leyê dê (ey) de zerê mi rehet nêbî. Uca pere zaf-zaf bî; ez uca de nika belkî bîbî îxracatçı, bîbî zengîn. Xora hevalê mi bî îxracatçî, bî zengîn. Ama zerê mi uca rehet nêbî, ez tatmîn nêbîyo. Coka ez ûca nêmendo. Mi no kar tercîh kerd. Çunke ma vanîme zonê ma vîndî nêbone, geleneg û gorenegê ma vîndî nêbêne; ma bav û kalê xo bizanîme, wayîr vejîme. Ê ke ma ra tepîya ênê, ma îna rê mîras verdîme, raye bimusnîme dîna.

-Merdim sîno (şîkîno) vajo seba welatperwerîye ra yo yan seba ke ti kitaban ra û nê karî ra hes kenî, nê karî ra tam gênî ti nê karî kenî?

-Ez karê kitabî ra hes keno ama ey ra ver, esas sevtanê welatperwerîye ra yo.

-Weşanxaneyê şima qet beşdarê (katılma) fuaranê kitaban beno?

-Ma beşdar benîme. Mesela ma çend serrî şîme "TÜYAP". Çend serrî îmkanê ma yê maddî çin bî, ma nêşîme; çunke nêzdiyê 2500 YTL pera wazenî. No dihîrê serrî yo ma oncîya şonîme. Hetanî ewro ma şeshewt dolimî kewtîme ci (dekewtî).

Ma emser kewtîme Fuara Grup Medya. Na fuare İstanbul-Tophane de bî. Feqet ma êndî nêşonîme.



Nêdabî naskerdene, kes nîyame. Zerar bî yanî. Seba na fuare jî ma 2000 YTL dê, zerar bî.

-Baş o, Kurdistan de ge-ge fuarê beledîyeyan benî. Şima şonî?

-Beledîya Dîyarbekirî fuar virazena ama ma dawet nêkenê. Ca nêdanê ma.

-Çira?

-Ez nêzano çira. Yayineviyê ke şonê fuare, ìna rê jî şertê xo estê, vanê şima gere kîtabanê Weşanxaneyê Dozî meroşê.

-Ê vanî "Ma terefdarê demokrasî û ekolojî yê". Gelo zerarê Dozî demokrasî û ekolojî rê esto ke nêverdanî?

-Nê, ci zerarê ma esto! Mi ci ra eynî nîya va: "Şima vanê 'bin kültür bir arada yaşasın'; Doz jî jû kultur o, wa o jî bêro". Va "Nê, ma şima nêwazenîme". Par ma no mesele kerd xebere, medya rê ruşna.

Xora venga ma nêdanê, ê kitabevî yan jî yayineviyê ke kitabanê Dozî berê, ìna jî nêverdanê. Ci ra vanê "Kitabanê dozî mîyarêne". Hetta par mehkemelik jî bî. Dîyarbekir de kitabevîyê bî -ez nika namê ey mevajîne, zerar vîneno-, Beledîye wayîrê dê da mehkeme. Bahane jî Doz bî, suçlama çiyode bîn bî. Vatê vergîyê xo nêdo. Ma waşt nê meseleyî ser o hîna zaf vindîme feqet wayîrê kitabevî va "Namê mi mevajêne", ma jî nêva.

-Ti vanî seba ke kitabê şima vila kerdî gerreyê ey kerd?

-Tabî. Xora ci ra vanê, o jî vano “Ez defêna bi ê kitaban nêno”, aye ra tepîya dewa ra fek veradanê.

-*No keso ke ti behs kenî, kitaban roşeno?*

-Kitaban roşeno, kitabçî yo.

-*Çirê bi taybetî kitabanê şima nêwazenî?*

-Ez texmîn keno kitabê ma û kovara Serbestî nînê hesabê ïnan, aye ra wo. Ti zanî, ma kovara Serbestî vejenîme. Tesîrê kitabê Necdet Buldanî, yanî PKK’de Kadın Olmak; kitabê Hasan Yıldızî, yanî Muhatapsız Savaş Muhatapsız Barış û kitabê Selîmî jî esto.

-*Selîm Çürükkaya?*

-Heya, kitabê ey, Apo’nun Ayetleri.

-*La seba nê kitaban wendoxan ra çi tewir reaksîyonî amey?*

-Kesê ke PKKlı yê hers benê ama wendoxê bînî vanê “Şima rind kerdo neşr kerdê, wa milet biwano bizano nê çik ê, çinayî rê xizmete kenê”.

-*Nê kitabî zaf roşiyayî?*

-Ma kitabanê Necdet Buldanî û Selîm Çürükkayayî her jûyî ra hîrê hezarî çap kerdî. Her di jî hema-hema ke biqedîyê. Ma kitabanê tirkîyan ê bînan di hezarî çap kenîme, ma nê hîrê hezarî çap kerdî. Ma nêzdî ra dolima dîyine jî çap kenîme.

-*Sey çapa verên î yan tede çîyê neweyî estê?*

-Kitabê Selîm Çürükkayayî de tey (tayê) çîyê neweyî estê.

-*Weşanxaneyanê kurdan ra weşanxaneyo ke wayîrê çapxaneyî bibo esto?*

-Nê, çin o.

-*Şima kitabanê xo qet danî kitabxaneyan?*

-Nê, ma nêruşnenîme. Matbaa bi xo basin polîsî rê ruşnena, basin polîsî jî ez texmîn keno des heban ruşneno kitabxane.

-*Kamcîn kitabxane?*

-Kitabxaneyanê tirka.

-*Ti nêzanî kamcîn û?*

-Ez nêzano.



-*Gelo ti zanî, kitabxaneyanê Tirkîya de qet kitabê kurdkî estê?*

-Hetanî ewro mi nêdiyê.

-*Ez zana, tayê kitabê kurdkî Millî Kutuphane de estê. Tayê kitabê Weşanxaneyê Dozî zî uca estê.*

-Estê? Xora des hebî şonê basin savcisî, ijâ ra jî şonê Millî Kutuphane.

-*Şima bi xo qet nêceribna, şima kitabê xo nêday kitabxaneyan?*

-Nika ma panc-şeş serrî naye ra raver muracaat kerd. Mi lîste vete, mi muracaatê nêzdî vîst kitabxaneya kerd, mi mudiranê kitabxaneyan rê mektube ruşnê. Hem Kurdîstan hem jî şehîranê gîrsanê Tirkîya rê. Mesela kitabxaneyê Dîyarbekir, İstanbul, Îzmîr, Adana, Muğla rê. İl Halk Kütüphanesi rê, İstanbul de Atatürk Kütüphanesi rê. Mi va kamcî kitabê ma vejîya ez şima rê biruşnîne, aye ra tepîya ez fatura biruşnîne, peranê ma biruşnîne. Qet kesî ra cewab jî niyame.

-*Baş o, wexto ke şima kitabanê kurdkî neşr kenî, krîterê şima çi yê?*  
Yanî şima çi tewir kitaban weçînenî? Şima rê nînan ra kamcîn hîna muhîm û: Zafroşiyayîş, waştişê (telebê) wendoxan, fîkrê welatperwerî, kalîteyê ziwan û edebîyatî?

-Ma wazenîme kitabê kurdkî yê ke ma neşr kenîme xizmetê zon û kulturê kurdkî bikêne. Ma bi xo uzman nîme, çîyo ke ma rê muhîm o, ma vanîme wa zonê kitabî rind bone (bibo) û fîkrê welatperwerî tey bibone.

-*Merdimê ke ziwanê kurdkî weş zanî û weçînayışê kitaban de şima rê yardım kenî, estê?*

-Di hevalê ma estê kurmanckî weş zanê.

-*Hevale şîma bi xo yê yan teber ra yê?*

-Nê, hevalê ma yê. Wexto ke ma nêşikînê, teber ra jî hevalî estê, ma danîme dîna.

-*Eke teber ra bibî, şîma ucret danî yan se dost şîma rê yardım kenî.*

-Se dost yardım kenê. Na pîyasa ma kurdan de ucret çin o!

-*Wesanxaneyê şîma de kam qerarê neşrkerdiş yan zî neşrnêkerdişê kitabanê kurdkî dano? Ti danî?*

-Ê hevalê mayê ke kurdkî zanenê, kitabî wanenê, ser o fîkrê xo vanê, ma gore dê (ey) pîya qerar danîme.

-*Kesê ke wazenî şîma kitabanê ìnan ê kurdkî neşr bikî, zaf estê?*

-Seba neşrkerdişî ma rê zaf dosyayî ênê ama kalîteyê zafêrê ìnan rind nîyo. Mesela zaf “şîirî” ênê. Nika birîyayî, verde belkî her roj dosyayî amêne. Verde hepisxaneyan ra jî zaf amêne, nika zaf nînê.

-*Wexto ke şîma neşr nêkenî, reaksiyonê ìnan senî beno?*

-Tayê miradînê (heridînê), telefon kenê.

-*Qapaxanê kitabanê şîma kam virazeno?*

-Ma bi xo virazenîme.

-*Karê rastkerdişî (teshîhî) û mîzanpajî kam keno?*

-Ey jî ma kenîme. Karê teshîhî, hevalanê ma ra Mehmed Sanri û Koroxlu Karaaslan kenê. Tayê nuştoxî bi xo jî karê teshîhê kitabanê xo kenê?

-*Kitabê şîma kam şaristanan de yenê rotiş?*

-Kitabê ma zaf şehîran rê şonê feqet kitabê kurdkî en zêde Dîyarbekir,

Batman û Qiziltepe de ênê rotene. Şehîranê tirkan ra jî İstanbul, Îzmîr, Anqara, Adana û Mersîn de. Nê şehîran de kitabrotoxî (kitabçî) kitabanê ma roşenî.

-*Kitabrotoxî şima ra se ra çend gênî?*

-Se ra poncas.

-*Şima kitabanê xo yew çapxane de danî çapkerdiş yan çapxaneyanê cîya-cîyayan de?*


-Jû çapxane de.

-*No çapxaneyê kurdan o?*

-Peyayê ke uca xebetînê hem kurd ê hem şoreşgêr ê feqet ez wayîrê çapxaneyî nas nêkeno.

-*Şima çira o çapxane weçînayo û çira kitabanê xo tim uca danî çapkerdiş?*

-Verde wexto ke ma ser a (o) basqî zêde bî, ê çapxaneyanê bînan cesaret nêkerdêne kitabanê ma çap bikêne. Nêtawrêne (nêewtanaynî). Nê mordemî dewamlî kitabê ma çap kerdê, aye ra ma êndî ewro jî uca danîme çapkerdene.



-*Yanî wayîrê ucayî tena menfeetê xo yê tîcarî nêfikirîyayêne?*

-Nê, tena mesela menfeetê tîcarî nêbî?

-*Makîneyê inan filan, kalîteyê çapkerdişî senîn o?*

-Xirab nîyo, rind o. Tabî deha rindî jî estê. Ê deha giran (vay) ê. Jû jî, zeke mi va, ma nas îme, dost îme. Roja tenge de ê leyê ma de bîyê, ma jî nêwazenîme roja hîratîye de îna terk bîkîme, ca verdîme.

-*Katalogê weşanxaneyê şima esto?*

-Nê, çin o.

*Vate* \_\_\_\_\_

-*Lîsteya kitabanê şima?*

-Esta.

-*Şima lîsteya xo qet vila kenî?*

-Ma vila kenîme. Ma ruşnenîme daxitima, ruşnenîme kitabevîya.

-*Vilakerdişê umûmî de, yanî “genel daxitim” de kitabê şima yenî vilakerdiş?*

-Genel daxitim de vila kenê ama zaf vila nêkenê, şenik (tay) vila kenê. Mavajîme kitabanê kurdkî ra sed tene, kitabanê tirkî ra hezar tene cénê (gênê) vila kenê. Vanê “Ma nêşikînîme kitabanê kurdkî vila bikîme”.

-*Ti vanî kitabê kurdkî nêroşiyêni yan vilakerdoxi, yanî “daxitimci” seba şovenbîyayîsi ra nêwazenî vila biki?*

-Ez texmîn keno nêroşînê, aye ra yo. Tabî ê tîcarî fikirînê.

-*Ê şima ra se ra çend gêni?*

-Ê jî se ra poncas cêne.

-*Weşanxaneye şima de çend komputurî estê? Makînaya şima ya fotokopî, skayner estê?*

-Çar komputurê ma estê. Makînaya fotokopî çin a feqet skayner û faks estê.

-*Şima tîya (buroyê weşanxaneyî) de zî kitaban roşenî?*

-Zaf tay. Tek-tuk mordemî yenê ita kitab herînenê.

-*Şima bi wasiteyê Internetî kitaban roşenî?*

-Nê, ma hetanî nika nêrotê.

-*Keyepelê (web site) şima esto?*

-Çin o. Ma jû mordemî ra va ma rê viraze, hezar dolar waşt; ma hezar dolar peyda nêkerd.

-*To bi xo kitabo kurdkiyo verên çend serrîya xo de di? Yeno vîrê to?*

-Wexto ke mi kitabê kurdkiyo verên dî ez qij bîyo. Mi a çax îlkokule (dibistane) de wendêne. Belkî ez des serre bîyo. O kitab kurmançkî bî û bi herfanê erebkî bî. Meleyê dewa xalanê mi bî, dewe de ma rê o kitab wend.

-*To va mele, qey şima elewî nîyê?*

-Piyê mi elewî, maya mi sunî ya. Dewa xalanê mi de, meleyî ma rê o kitab wend, aye ra tepîya kitabo kurdkî yo ke mi dî kitabê Mem û Zîne bî. Mi no kitab unîversîte de dî.

-*Yeno vîrê to, to ser o senî tesîr kerd?*

-Nê, weş nêno vîrê mi.

-*To bi xo seba tersê dewlete ra qet kitabî veşnayî?*

-Mi nêveşnayî feqet min û birayê xo wextê cûntaya 12 Mart (Adare) 1971î de, ma dewe de zaf kitabî kerdî binê hardî. Ma di serrî aye ra tepîya şîme kerd ya (akerd) ke kulî poyîyê (helisîyayê).

-*Nika seba kitaban bandrol lazim o. Verê bandrol çin bi, key vejîya?*

-No şeş-hawt serrî yo bandrol esto.

-*Seba çî yo?*

-Seba ke kontrol bikerê, çapkerdişê korsanî yê kitaba onlemîş bikerê.

-*Ti vanî tesîrê ey beno?*

-Ez texmîn nêkeno, çunke kam şoro biwazo danê ci. Serê bandrolî des quruşa wazenê. Mavajîme ez şono jû weşanxaneyî ra vano mi rê des hezarî bandrol bicê (bigîre), şîkînîrê bicê; kontrol nêkenê yanî.

-*Kitabê kurdkiyê ke korsankî vejîyayî estê?*

-Ez texmîn nêkeno, cîmkî taleb çin o. Kitabê ke zaf ênê rotene, korsanî ê kitaban vejenê.

-Mi çapa korsane ya kitabê Hesen Cemalî, Kürtler dî. Kitabê ke kurdan ser o, yanî derheqê kurdan de nusîyayî, ti qet pêhesîyayî ke ïnan ra korsankî çap bîyê?

-Ez texmîn keno kitabê Barzanî yo ke ma vet, korsanê dey jî vejîya. Çapa korsane ya Şerefnameyî -bi tirkî- vejîyabî.

-Verê, kitabê kurdkî qedexe bîy, nika qedexe nîyê.

-Nê, nika kes qarişê ci nêbeno.

-Çi wext ra pey no mesele wina bi?

-Nê serranê peyênan, ez texmîn keno deha zaf jî nê qanûnê Avrupa Bîrlîgî (Yewîya Ewropa) ra tepîya zêde qarişê kitabanê kurdkî nêbî. Aye ra ver jî deha zêde kitabê ke sîyasî bî, kurda ser a (o) bî, tarixê kurda ser a bî, ê top kerdêne; derheqê ïnan de dewamlî dewayî kerdêne ya, qedexe kerdêne feqet qarişê kitabanê kurdkî nêbîyêne.

-Ti vanî çira nê serranê peyênan qarişê kitabanê kurdkî nêbîyêne, sebebê xo çi yo?

-Wille ez nêzano, o sîyasetê dewlet o.

-Nika zî kitabanê tirkîyan ê ke derheqê kurdan de nusîyayî qedexe kenî?

-Nê, nika ïna ser a jî nêvindenê.

-Baş o, keyeyê to awan bo. Çiyê ke mi waşt bipersa nê bîy, eke sewbîna çîyo ke ti biwazî vajî esto, vaje.

-Ez zaf sipas keno, çiyede bîn çin o.

# **LAWO LAWO HEMDÎ!**

**Newzat GEDIK**

Lawo, lawo!  
Kilamê to  
kilamê to gonî kenê zerê ma

Vengê to  
beno vayê pukeleke  
gujeno goşanê ma de  
ca û cangirê ma beno hesretê  
hardê Heqî ra vejînîme  
wîîiy pepo bavo!

Sebrê ma bî teng  
bîna ma nêna.

Sewda to  
xezalêde kovîye  
fetilnenîme koyanê Şerefîn û Bingolî ra.

Bêçikê to  
bêçikê to yê ke ti pê nivisnena  
benê tîra Heqî  
ginenê ma ra  
zerrîya ma qule kenê.

Ziwanê to  
ti ke şîre wanena  
beno xençerêde şeşver  
ma keno hurdî-hurdî, lete-lete.

Germîya zerê to  
ma hardê Heqî ra vejena  
porê sereyê ma beno gjî.

Lawo, lawo, Hemdî!  
Yan ca verde merdimîya xo  
yan kî xapê bide ma  
xo pê bixeniqnîme  
axur de  
arra herî ser a.

**Deniz Gunduz:**

**EKE ÎMKANÎ BIBÎYÊNE, MI KLASÎKÊ EDEBÎYATÊ DINYA  
DAYÊNE AÇARNAYENE Û BI KIRMANCKÎ NEŞR KERDÊNE**



Deniz Gunduz

*Wayîrê Weşanxaneyê Vateyî Deniz Gunduz, serra 1976 de yew dewa Gimgimi (Vartoyî) de maya xo ra bîyo. Hîna (hema) Unîversiteya Anadolu ya Eskîşehîrî de besa tarîxê hunerî (seneti) de waneno. Serra 2003 de Swêd de, Unîversiteya Upsala de yew termîn kurdîkî zî wend. Weşanxaneyê Vateyî 2003 de abi û heta serra 2006î şîyêş kitabê kirmancî (zazakî) vetî. Mi 12.03.2006 de Denizî de roportajo cêrên kerd.*

***Malmîsanij***

*-Deniz, karê weşangêriye ra ver to çi kar kerdinî?*

*-Domanîya xo ra no het ez xebitîyo. Mi Kurdîstan de kaviraniye û paleyiye kerde. Tirkîya de zî mi karkerîya înşaati û sanayî kerde; yanî ez karanê cîya-ciyayan de gurîyo. Serra 1996 de mi dest pêkerd ez Weşanxaneyê Komalî de gurîyo. Mi nêzdiyê hîrê serrî temsîlkarîya Şûbeyê Îzmîrî yê Wêşanxaneyê Komalî kerde.*

*Wexto ke ez temsîlkar bîyo mi bi kirmancî (zazakî) romanê “Kilama Pepûgî” nusna. Serra 2001 de mi dest bi xebata kovara Jîvana Rewşenî kerd. Ez yew serre na kovare de sey nuştoxê kirmancî gurîyo.*

-Seba akerdişê weşanxaneyî, hetê resmîyetî ra çi wazenî?

-Seba weşanxaneyî yew şirkete lazim a. Na şirkete anonîm, limited yan zî şexsî bena. Seba şıkete, merdim bi senedê iqametgahî û suretê nufusî muracatê Dayîreyê Bacî (Vergi Dairesi) keno û şirkete ronano. Ti wazenî bi nameyê na şirkete kamcîn karan bikî, ti danî zanayene. Şirketa ma şêna karê weşanî, vilakerdişî, çapkerdişî û reklamî biko. To ke şirkete ronaye, ti adresa şirketa xo nîşan danî. Yew memurê bacî (vergi) yeno cayê to tesbit keno û şirkete bena resmî. Badê, ti seba tayê prosesan benî endamê Odaya Ticaretî (Ticaret Odası).

Eke ti biwazî kovarêke vejî, sey wayîr û berpirsiyârî ganî ti bi sene-da iqametgahî, suretê nufusî, diploma (tewr kêmî ê lîse) û kaxita temîzî, muracatê qismê weşanî yê emnîyetî bikî. Qeydê ucayî ra pey ganî ti muracatê valîyîye zî bikî.



Tirkîya de, çarçewaya qanûnanê Pêamayîşê Yewîya Ewropa (YE) de, Wezaretê Kulturî newen-newe seba weşanxaneyan girewtişê sertifikaya weşangêriye wazeno. Labelê girewtişê naye hîna mecbûrî nîyo.

-Kitabê şima yê ke qedexe (yasax) bîyê yan zî arê bîyê, estê?

-Ney.

-Her yew kitabê şima ra çend hebî çap bîyê?

-Ma her kitabî ra hezar hebe çap kerda.

-Mavajî eke kitab 150 rîpel bibo, mesrefê çapkerdişî çiqas beno?

-Yew kitabo 150 rîpelin, ebadanê 13.5 X 19.5 cm de, bi 1.500 YTL çap beno. Labelê seba ke ma bi xo karanê mîzanpaj, grafikê qapaxî û redaksiyonî kenîme bi 1000 YTL ra çap kenîme.

-Heqê çape (basım) weşanxane bi xo dano yan nuştoxî zî danî?

-Heqê çapkerdişê tayê kitaban ma bi xo dayo, yê tayê kitaban zî nuştoxî dayo.

- Her kitabê şima ra çend hebî roşiyêni?*
- Teqrîben 150-200 kitab yeno rotene.

*-Kitabê şima senîhawa (çitur) roşiyêni?*  
 -Kitabê ma zafane (zafêrî) dest ra yenê rotene.  
 Dîyarbekir, Çewlîg, Xarpêt, İstanbul, Anqara, Îzmîr  
 de ma kitaban danîme kitabrotoxan. Tayê cayan  
 de zî kesê ke kirmancî rê eleqedar ê, dest ra roşenê.




Ma tayê kitabanê xo danîme şîrketanê vilakerdişî. Yew wext ma kitabê xo bi sîstemê katalogî serrarotişi zî rotê.

*-Şîrketê vilakerdişî kitabanê şima hol vila kenî?*  
 -Heta ewro ma tena kitabî dayê yew şîrketa vilakerdişî. Ma her kitabê xo ra vîst tene da na şîrkete û hesabê xo çar aşman ra pey vînenîme. Eke kitabî çar aşman ra pey bêrê rotene ma peranê xo gênîme. Sed ra hîris şîrkete heqê xo gêna. Kitabê ke nîyamê rotene yan ma tepîya gênîme yan zî ïnan ver a sewbîna kitaban gênîme.

*-Kitabê şima tewr zaf kamcîn şaristanan de roşiyênenê?*  
 -Çewlîg, Dîyarbekir û İstanbul de.  
  
*-Şima buroyê weşanxaneyî de kitaban roşenî?*  
 -Belê, teqrîben çar ra yewê (1/4) kitaban ma buroyê weşanxaneyî de roşenîme.

*-Şima bêpere zî tayê kitaban vila kenî?*  
 -Ya.  
  
 -Çend heban û şima danî kamî?  
 -Ma her kitabî ra 50-60 hebe bêpere vila kenîme.  
 Zafêriyê nînan ma şawenîme (rusnenîme)  
 hepisxaneyan. Kesê ke pereyê xo çin ê û ma bawer  
 îme ke wanenê, ma kitaban bêpere danîme ïnan





zî. Zafêriyê nê embazan wendekar ê.

-Şima çend hebî kitaban danî nuştoxê / nuştoxa kitabî?

-Seba ke ma heta ewro heqê telîfi sey pereyî nêdayo nuştoxan, ma ver a ê heqî zafêrî kitaban danîme. Heta ewro ma goreyê waştişê nuştoxi / nuştoxe, beyntarê 100 û 350 tene kitaban de kitabî dayê ìman. Mavajîme nuştox esto 100 tene waştê, nuştox esto 350 tene waştê; çend waştê ma dayê ìnan. Sîndorê ma 350 tene kitabî yê.

-Şima seba rotişî qet kitabî şawitî Ewropa? Roşiyayî?

-Ma reyê her kitabî ra 40 tene şawit (rusna) Almanya (kitabê ma yê ke heta 2005 neşr bîyê). Heta nika pereyê hîrê ra yewî (1/3) ameyî.

-Welat de û Ewropa de ferqê vayaya (fîyatê) kitabanê şima bi?

-Seba ke mesrefê posteyî yeno ser, kitabî Ewropa de bineyna vayî yenê rotene.

-Şawitişê kitaban de zehmetîyê burokratîk û resmî vejîyêni?

-Ney, zahmetîya xo çin a. Ez bi xo rast nîyamo.

-Gelo şima bi wasitaya Internetî kitaban roşenî?

-Ney.


-To bê xebera wayîrê heqê telîfi qet kitabî neşr kerdî?

-Ney.

-To qet seba dayene şinasnayena kitabanê şima bi peran ilan dayo?

-Ney.

-Kitabanê şima kovar û rojnameyan de yan zî televîzyon de kes dano şinasnayene?



-Kitabanê ma ra Ferhengê Tirkî-Kirmanckî/Kirmanckî-Tirkî û Rastnuştişê Kirmanckî (Zazakî) kovara Tîroj de, Ferhengê Tirkî-Kirmanckî/Kirmanckî-Tirkî, Rastnuştişê Kirmanckî (Zazakî), Ferhengê Îdyomanê Kirmanckî, Hewnê Newroze, Estanikanê Sêwregi ra, Hîkayeyê Koyê Bîngolî zî kovara Uzun Yürüyüş de dayê naskerdene. Labelê kesî kitabê ma televîzyon de nêdayê naskerdene.

*-Ti endamê Türkiye Yayıncılar Birliği yi?*

-Ya.

*-Goreyê fîkrê to, hîrê problemê tewr muhîmî yê weşangêriya kurdkî kamcîn i?*

-Hîrê problemê muhîmî nê yê: Nuştoxî zaf tay ê. Wendoxî zaf tay ê. Îmkanê ma yê maddî zaf tay ê.

*-Eke îmkanê maddî bibîyêne, to sey weşangêri waştêne çi bikî?*

-Eke îmkanî bibîyêne, mi klasîkê kurdkî (kurmanckî, sorankî, gorankî) dayêne açarnayene û bi kirmanckî neşr kerdêne. Mi klasîkê edebîyatê modern ê kurdan û ê dinya dayêne açarnayene û bi kirmanckî neşr kerdêne. Mi seba musayîşê kurdkî yew setê perwerdeyî dayêne viraştene. Yew ferhengê umûmî yê arêkerde yê kurdkî (Kürtçe derleme genel sözlük) neşr kerdêne. Mi seba vilakerdişê kitabanê kurdkî yew şîrketa vilakerdişî akerdêne (kerdêne ya). Mi yew çapxane akerdêne. Mi seba musnayîşê kurdkî bêpere kursî akerdêne.



*-Ti çirê karê weşangêri kenî?*


-Ez nê karî ra hes keno.

*-Internet de keyepelê (web site) weşanxaneyê şima esto?*

-Ney.

*-Şima beşdarê fuaranê kitaban benî?*

-Fuarê girdî yê ke bajaranê sey İstanbul û Îzmîr de benê, seba



beşdarbîyayîşê weşanxanî peran wazenê. Seba ke îmkanê ma çin ê, ma heta ewro beşdarê nê fuanan nêbîme. Tena par (2005) ma Kurdistanê Başûrî de, Silêmanî de, beşdarê Fuara Festîvala Gelawêjî bîme.

-Şima kitabanê weşanxaneyê xo qet danî kitabxaneyan?

-Ney, ma heta ewro nêdayê. Tena ma dayê Kitabxaneyê Beledîyaya Gimgimî.

-Gelo çapxane kitabanê şima Kitabxaneyê Millîyî (Milli Kütüphane) rê şaweno?

-Belê, çapxane her kitabê ma ra des heban gêno, Milli Kütüphaneyî rê şaweno.

-Kam qapaxanê kitabanê şima virazeno? Şima seba qapaxan ucret danî?

-Heta nika hîrê embazan qapaxê kitabanê ma viraştê. Bê pere viraştê.

-Kam mîzanpaj virazeno?

-Ez bi xo virazeno.




-Kam kitabanê şima redakte keno?

-Tayê kitaban ez redakte keno, tayêne zî nuştoxî bi xo kenê.

-Kitabê şima heme yew çapxane de çap bîy yan çapxaneyanê cîya-cîyayan de?

-Ma çapxaneyanê cîya-cîyayan de dayê çapkerdiş. Kamcîn çapxane erjan û bi kalîte çap biko ma kitaban uca çap kenîme.



-Kaxita kitaban şima bi xo herînenî yan çapxane herîneno?

-Heta ewro çapxaneyî bi xo herînaya.

-Çend komputurê şima estê?

-Di.

-Makînaya şima ya fotokopî û skayner estê?

-Ya, estê

-Kitabanê ke şima neşr kenî, şima goreyê çiyî  
weçînenî? Krîterê şima ci yê?

-Eke kitabo edebî bo, ma rê kalîteyê ey ê hunerî; eke kitabo îlmî bo,  
kalîteyê ey ê îlmî muhîm o. Bêguman hetê ziwanî ra zî kalîteyê ey  
muhîm o.

Yewna çî zî esto. Seba ke kitabê kurdkî newe-newe yenê nuştene,  
merdim ganî rewşe û sewîyeya eseranê kurdkî bigîro çiman ver. Beno  
ke kalîteyê kitabanê kurdkî biney nizm bimano.

-Qerarê neşrkerdişê kitaban kam dano.

-Ez dano.

-Keyeyê to awan bo. Ez sipas kena.

-Ê to zî. Ez zî sipas keno.



# **REMAYEYÊ HELA TENG**

**W. K. MERDIMÎN**

Vera zaliman  
Bêdest û bê ziwan o.  
Mîyanî zeîfan d' gefan şano  
Ti vanî  
de hey kam o.  
Vaje, keyeawan!  
Ti ganî  
Ling erd ro şanî vera zaliman  
Bibî hemderdê mezluman  
Belê!  
Camêrdo namedar  
Ca ame serewişk û rikdar  
Ca ame zertenik û rehmwar  
Vera zaliman serewişk  
Mîyanî mezluman de nefşşenik.  
Sereyê xo ano war.  
La,  
Remayeyê hela teng  
Ne sewtek, ne zî veng  
Ne ardî û arîş  
Ne zî arê û deng  
Bê şarme û bê heyâ  
Nêzana çira ciwîya?  
Mîyanî namedaran de  
Muhtacê yew çeng.

Hezîrane 2006

## WEŞANXANEYÊ BÎRÎ RA

Weşanxaneyê Bîrî serra 2005î de Dîyarbekir de abi. Eynî serre di kitabê kurdkî neşr kerdî. Barê nê weşanxaneyî Seîd Verroj û birayê ey Turgut Ersoyî ser o yo. Resmîyet de Turgut wayîr o.

Weşanxaneyê Bîrî ra ver Seîdî û çend embazanê xo Weşanxaneyê Warî idare kerdinî. Resmîyet de wayîrê verênê nê weşanxaneyî Qember Soypak bi. Hûmara şesina kovara Warî ra pey -heta hûmara desine- Rifat Ateş, hûmara desine û yewendesine de Seîd Verroj, dima zî Turgut Ersoy bi wayîrê nê weşanxaneyî. Weşanxaneyê Warî 1997 de abi, 2004 de padîya. No mabeyn de nê weşanxaneyî 15 kitabê kurdkî neşr kerdî. Buroyê nê weşanxaneyî verê İstanbul de bi, dima berd Dîyarbekir.

Seîd û Turgut nika Dîyarbekir de bi nameyê Bîrî kovarêk zî vejenî. Hem Bîr hem zî kovara Warî ya ke verê vetibî, bi kurdkî-tirkî yê.

Mi 10.02.2006 de berpirsiyârê Weşanxaneyê Bîrî Seîd Verrojî de roportajo cêrên kerd. Turgut Ersoy ma het bi, ge-ge ey zî fîkrê xo vatî. Cayê ke nameyê ey nusîyayo Turgut cewab dano, cewabê bînî cewabê Seîd Verrojî yê.

**Malmîsanij**



Seîd Verroj

*Malmîsanij: Seîd, ti kure (kotî) û key maya xo ra bîyî?*

Seîd Verroj: Ez serra 1966 di, dewa Hopi -ki girêdayî Pîranî ya- di

marda xo ra bîya.

-To çi wendo?

-Mi Egîtîm Fakultesi di qismê Kîmya xelas kerd.

-Karê weşangêri (yayimcılık) ra ver to çi kar kerdinî?

-Nê karî ra ver mi mamosteyî kerdinê. Anka ez him mamostayî him zî karê weşangêri kena.



Turgut Ersoy

-Turgut, ti?

Turgut Ersoy: Ez 1977 di marda xo ra bîya. Mi lîse xelas kerda. Enî gûrî ra ver ez karanê bînan di, mavajî loqante di, karê mobîlya di xebitîyayo.

-Weşanxaneyê Warî 1997 di abi?

-Belê, serra 1997î di ma yew şîrketa lîmited bi nameyê “Kor”î akerdi û kovara Warî veti.

-Seba akerdişê resmî yê şîrkete çi waştene?

-Ay (o) wext qabê (seba) şîrket û kovari, new-des hebî belgey waştinê. Mesela diploma, cuzdanê nufusî, belgeyê iqametgahî, sabiqâ belgesî, qerarê ortaxanê şîrketi. Hergû yewî ra şeş-hewt nusxeyî waştinê û hergû yew yew cay rî erşawitinê.

Ema 2003 di basin-yayin qanûnî (qanûnê çapemenî û weşanî) bi şeklo newe vejîya. Enî qanûnî ra pey gure rehet bi. Ti tena dîlekça danî Cumhuriyet Savciliğî, beyanname dekenî danî walîlix. Yanî gure asan bîyo.

-Şima cirê nameyê Weşanxaneyê Warî bedilna kerd Bîr?

-War di ez û qorrî (tayê) embazî pîya bî. Heta yew nuqta ame, xetimîya. Ay (ê) embazan va “War ê ma pîya wo, ma qebûl nêkenê ki ti bi nameyê Warî dewam biki”. Nê xetimîyayîşî ra pey ma War vindarna (edilna) -him kovare him zî weşanxane- û dest bi Bîrî kerd.

-Resmîyet di wayîrê weşanxaneyê Bîrî kam o, pratîk de karê weşanxaneyî kam keno?

-Resmîyet di Turgut tena yo. Pratîk di bar ma wir (her) dîyini ser o yo.

-Kitabanê şima ra kitabo ke qedexe (yasax) bîyo, esto?

-Ney.

-Her yew kitabê şima ra çend hebî çap benî?

-Hinzar (hezar) hebi.

-Mavajî eke kitab se rîpel bibo, tena mesrefê çapkerdişî çend beno?

-Teqrîben 750-800 YTL beno.

-Her kitabê şima ra teqrîben çend hebî roşiyêni?

Turgut Ersoy: 200 hebi ancax bêrê rotiş.

-Şima bi xo roşenî yan şima danî kitabrotoxan, yanî “kitapçı”yan?

-Ma him danê kitapçîyan him zî ma bi xo roşenê.

-Verê buroyê weşanxaneyê şima İstanbul di bi. Şima key û cirê ard Dîyarbekir?

-Ma va ki her vaş kokdê xo ser o kuho beno. Bi ay (ê) mentiqî ma 2003 di ard Dîyarbekir.

-Şima kitabanê xo danî şîrketanê vilakerdişî, yanî “daxitim şîrketî”?

-Wexto ki ma İstanbul di bî ma daynê feqet daxitim şîrketî bê zerri kitabanê kurdîkî gênê. Peranê kitaban erey (berey) danê. Ena gami ma kitabanê xo nêdanê ïnan.

-Nêgirewtişê ïnan semedê şovenî ra yo yan semedê çinbîyayışê bazarê kitabanê kurdîkî ra yo?

-Bazarê jînî (ïnan) cin o. Vanê “Yew kitabanê kurdîkî nêerîneno”.

## *Vlate* \_\_\_\_\_

-Şima bêpere zî tayê kitaban vila kenî?

-Belê.

-Çend heban?

-Her kitabı ra kemî der (tewr kemî) ma pancakes hebi se protokol bêpere danê. Enî kitaban ra teber, ma pancakes kitabî zî Kurdistanê Başûrî rê, dezgehanê werrayî (ucayî) rê erşawenê.

-Şima danî kamî?

-Ma danê dezgehan û qorrî şexsîyetan.

-Şima seba rotişi kitaban şawenî (ruşnenî) Ewropa?

-Ma verê kitabî erşawitî Îsveç, Almanya û Fransa feqet semedo ki pereyê ki ti (ci) ra amey heqê postî rê nêvetinê dima ma fek ti ra verada.

-Welat de û Ewropa de ferqê vayaya (fiyatê) kitabanê şima bi?

-Ey ferq bi tabî. Çunkî wexto ki to kitabî erşawitî Ewropa, mesrefê postî zî zaf beno.

-Heta euro, şima qet heqê telîfi se pere dayo?

-Ney.

-Kitabê ki şima neşr kerdî, şima ìnan ra danî nuştoxê kitabî?

-Belê. Wexto ki teleb bibo ma danê. Heze (se) pere ma nişnê heqê telîfi bidê ema kitaban biwazê ma danê.

-Nuştox şima de bazar keno nê şima goreyê tesbîte xo kitaban danî ey/ay?

-Bazarey çin ya, ema nuştoxê ki biwazê ma danê.

-Şima çend hebî kitaban danî nuştoxi?

-Ma 100 hebi, 200 hebi danê.

-Kitabanê şima ra çend hebî ziwananê bînan ra ameyê tadayîş

(çarnayîş), yanî tercume yê. Şima heqê tadayoxî (tercumekerdoxî) danî?

-Ma peran nêdanê feqet ma kitaban danê.

-Şima seba ke kitabanê xo bidî şinasnayîş qet ilan filan dayo?

-Ney.

-Rojname, kovar yan zî televîzyonan de kesî kitabanê şima ser o nuşto?

-Ney

-Şima ra kes endamê Türkiye Yayıncılar Birliği yo?

-Ney.

-Çira? Şima nêwazenî yan sewbîna sebeb esto?

-Ma endambîyayîş di vêşî mana nêveynenê. Raşa der eger Kürt Yayıncılar Birliği (Yewîya Weşangêranê Kurdan) bibo, endambîyayîşê weyrayî ma rê mana jey (ey) esta.

-Goreyê fîkrê to, hîrê problemê tewr (en) muhîmî yê weşangêriya kurdkî kamcîn î?

-Problemê yewini vilakerdiş o.

Ê didini, problemê rotisi yo. Kurdî nêşenê (niştê) biwanê, wendoxê kitabanê ma kemî yê; kitabê ma kemî yenê rotiş.

Problemê hîrini zî maddî yo. Ma enî kitaban bi fedakarîya şexsî vejenê.

-Vilakerdiş de problem çi yo?

-Qabê (seba) ki kitabê kurdkî kemî roşenê, şîrketê vilakerdişî nêwazenê kitabanê kurdkî vila bikê, xo bibetlinê.

-Kitabê şima yê kurdkî mesrefê xo vejenî?

-Ney.



-To vatbi imkanê ma yê maddî çin ï. Eke imkanê şima yê maddî bibîyêne, şima sey weşangêrî waştene se bikî?

-Ez weşangêrey ra hes kena. Perey mi bibînê mi waştinê yew buroyo baş, “donanimlî” veyna û kitabanê kurdkiyan ê ki mi xo çima kerdî neşr bika. Mi waştinê pancakes kitabanê sorankî açarna kurmanckî ser.

Turgut Ersoy: Eke perey mi bibînê, mi waştinê kitabanê edebîyan ê miletanê bînan tada kirmancî (zazakî) û kurmanckî ser.

-Ti cirê nê karê weşangêrî kenî?

-Ma kurd ï, mileta ma bindest a. Welatê ma Kurdistan işxal bîyo. Degerê (erjê) ma heme ver bi vînbîyayışî şonê. Hedefê ma, pawitişê enî degeran, newe ra zengîkerdişê enî degeran û enîyan ser o nuştîş; çapkerdiş û vilakerdişê çîyanê nuştayan, yanî raşa der pawitişê nirx û degeranê netewî yo. Mi semedê enî hedefan weşangêrî tercîh kerdi. Cimaatî man (mîyan) di vilabîyayışê fîkrî di keda mi bibo ez pey (pê) rehet bena.

-Lehçeya to bi xo kirmancî (zazakî) ya. Hem kovara şima, yanî Bir hem zî kitabê ke weşanxaneyê şima vejeno çend îstîsnayan ra teber bi lehçeya kurmanckî yê. Ti cirê bi lehçeya xo kovare nêvejenî û kitabanê kirmancîyan neşr nêkenî, bi kurmanckî neşr kenî?

-Giraneya weşananê ma kurmanckî ser o ya la ne ki ma kirdkî (zaza) çap nêkenê. Di çî estî: Yew, ayê ki kirdkî binusî, nuştoxê kirdkî kemî yê. Eger nuştay kirdkî ma rê bêrê ma şenê çap bikê. Ey didini, ez kurdan heze yew mileti veynena. Ez kirdkî, kurmanckî, sorankî heze gilanê yew dari veynena. Ez yew ferq nêdekena beyntarê ïnan.

-Şima ferq nêdekenî beyntar labelê yewna çî esto. Lehçeya to bi xo kirmancî / kirdkî ya. To zî va ke na lehçe kemî nusîyêna. Gelo bi kirmancî nuştîş û averberdişê na lehçe lazim nîyo? Kirmanc ganî kede (emeg) nêdo kirmancî? O het ra zî yew mesulîyetî çin a?

-Mesuletey esta. Ma kenê feqet weyra di mesela mesela famê sîyasî û felsefi ya. Ez kurdan heze yew mileti veynena, ferq nêdekena beyntarê kirdî, kurmancî, soranî. Kurdistanê Bakurî di zafaneyê kurdan kurmanc

o. Beno ki çer (çar) ra hîrêyê jînî kurmanc bo. Wexto ki to yew weşan vet, ti wazenî xîtabê ena kîtle pêro bikî. Ti vajî nêvajî kurmanckî vêşî ya, hetê nuştîşî ra zî gora kirdkî deha rehet a, deha aver şîya. Ay sebeb ra ma deha zaf ca danê kurmanckî.

-*Internet de keyepelê (web site) şima esto?*

-Ney.

-*Weşanxaneyê şima qet beşdarê (katılma) fuaranê kitaban bi.*

Turgut Ersoy: Ney. Mesela par [2005], wita (tîya) di, Fuara Beledîyaya Dîyarbekirî bî, ma beşdar nêbî. Ma muraceet kerd, va “Ma xeberi danê şima”. Xeberi day ma, va “Ma veynda [venga] weşanxaneyan nêdanê, ma veynda kitabçîyan (kitabevîyan) tena danê.” Kitabçîyan ra zî pêro nê, di-hîrê hebî kitabçîyê xişnî. Ma ra ena va, ma nêşî la ma ra dimi veynda weşanxaneyan dawo.

-*Se nimûne kamcîn weşanxaneyî?*

-Mesela Weşanxaneyê Aramî, Belkîyî. Esas, qabê ki ma kitabanê Weşanxaneyê Dozî vila kenê, nêwazenê ma şêrê. Raşte-raşt ma ra nêvanê ema ay kitabçîyê ki şîbî, jînî ra vatbi “Gerek şima kitabanê Dozî nêroşê”.

-*Qey kitabanê Weşanxaneyê Dozî de çi esto ke hende înan ra eciz î?*

-Weşanxaneyê Dozî, çend kitabî sey kitaba Selîm Çürükkayayî “Apo’nun Ayetleri”, ê Nejdet Buldanî “PKK’de Kadın Olmak” û ê Hasan Yıldızî “Muhatapsız Savaş Muhatapsız Barış” vetê. Ay sebeb ra beledîya ambargo weşananê Dozî ser na. Ma zî na mintqa di kitabanê Dozî vila kenê û roşenê.

-*Şima beşdarê sewbîna fuaran zî nêbî.*

-Ney.

-*Şima qet kitabê xo day kitabxaneyan?*

-Ma bi xo raşte-raşt nêday ema her kitabı ra çapxane vîst hebi gêno.

-*Gelo ti zanî, kitabê şima qet kitabxaneyan de estê?*

-Mi bi xo nêdî ema qorrî embazê ki şî kutubxane, jînî dî.

-*Kure? Kamcîn kitabxane de?*

-Îstanbul di Millî Kutubxane di.

-*Millî Kutubxane Anqara de yo!*

-Mi bi xo nêdî, embazan ana va.

-*Kitabanê ke şima neşr kenî, şima goreyê çîyi vîjnenî (weçînenî)?*

*Kriterê şima ci yê?*

-Bala ma deha zaf ziwan, edebîyat û lêkolînanê kurdkî ser o ya. Tercîhê ma enî yê. Ma mîyanê kitabı, yanî naveroka kitabı zî gênê xo çiman vera, abo gore (goreyê aye) qerar danê.

-*Qerarî ti bi xo danî, kam dano?*

-Ez dana.

-*Qapaxanê kitabanê şima kam virazeno?*

-Ez bi xo virazena.

-*Mîzanpajê kitaban?*

-Mîzanpajî zî ez virazena.

-*Rastkerdişî (teshîhi)?*

-Kitaban ez rast kena la kovare ez, Roşan Lezgîn û Remezan Alan ma pîya rast kenê.

-*Nuştoxê şima estê ke vanî “Şima ganî (gerek) kitabê mi, nuşteyê mi nébedilnî; mi senî nuşto ganî winî vejîyo”?*

-Hetanî ena gami ez tena yew ray raşt ameya. A roji yew embaz Silopî ra mi geyra, va “Şima gerek nébedilnê, ez bi xo enawa (wina) raşt veynena, şima gerek qarmîş nêbî”. Mi va “Bê, ma veynê. Ma nêzanê to ci nuşto. Ez nêveyna ez nêzana. Manaya fikrî di ti çîyo cîya vajî, çiman ser. Ema ti çîyo eletewş binûsî, ez qebul nêkena”.

-*Kitabê şima kamcîn şaristanan de yenî rotiş?*

-Kurdistan di Dîyarbekir, Elezîz, Batman, Wan, Mêrdîn, Mûş. Heto bîn di Mersîn, İstanbul, Anqara, Edena.

-*Nê cayan de kitabrotoxî (kitabevi) kitabanê şima roşenî?*

-Belê.

-*Nê kitabrotoxî se ra çend şima ra gêni?*

-Se ra çewres.

-*Şirketê vilakerdişî (dağıtım şirketleri) se ra çend gêni?*

-Ê se ra pancakes gênê.

-*Kaxita kitaban şima bi xo erînenî yan çapxane erîneno?*

-Ma erînenê.

-*Katalogê kitabanê şima esto?*

-Ney, katalog çin o; lîsteya kitabanê ma esta, ma vila kenê.

-*Şima kitabê xo heme yew çapxane de day çapkerdiş yan çapxaneyanê cîya-cîyayan de.*

-Ma heta enka hîrê çapxaneyan di day çapkerdiş.

-*Cirê şima çapxane bedilna?*

-Ma hetê fiyatî ra, teqsîtî ra pênekerd, a ra.

-*Nê heme hîrê çapxaneyî kure yê?*

-Îstanbul di.

-*Qey şima Dîyarbekir di nêdanê çapkerdiş?*

-Dîyarbekir di çapkerdiş vay o. Hema-hema ki di qatê çapxaneyanê İstanbullî vay o.

*Vate* \_\_\_\_\_

-Çend komputurê şima estê?

-Yew tena ya.

-Makînaya şima ya fotokopî, skayner?

-Makînaya fotokopî çin a la skayner esto.

-Şima tîya (buroyê weşanxaneyî) de zî kitaban roşenî?

-Ra-ray, eger cay yew bêro biwazo.

-Nika seba kitaban bandrol wazenî. Ti vanî bi bandrol vernîya kitabanê korsanan gîriyêna?

-Tesîrê bandrolî yo musbet esto ema qabê ki kitabê korsanî zaf erjan ê, wendox rayna zî kitabanê korsanan erîneno.

-To bi xo kitabo kurdkîyo verên çend serrîya xo de dî?

-Raya verêni, wexto ki mi sinifa yewina lîse di wendinê, 1981 di mi kitaba Kamran Alî Bedirxanî dî; gramerê jey. Mi Lîseya Dîyarbekir (Diyarbakır Lisesi) di wendinê. Mi ay gramer yew embazî hete dî. Eskerî darbe bîbî; ay wext kitabçîyan hete bîyayîşê kitabanê kurdkî mumkun nêbi. To nêşenaynî yew pelê kurdkî, yew bandê kurdkî pîyase di veynî!

Mi a kitabı dî û Şivanê Kurd ê Erebê Şemoy di.

-Yeno vîrê to, to de senî tesîr kerd?

-Heze ez yew çîyo newe veyna! Mi heta ay wext bi kurdkî çîyo nuşte nêdibi.

-La to Turgut?

Turgut Ersoy: Key mi kitaba verêni dî nîna mi vîrî la yeno mi vîrî ki mi bandê Şivanî zaf goşdaritinê. Mi keye di kitabê kekê [Seîdî] dîbî.

-To qet tersê dewlete ver kitabî veşnay?

-Mi nêveşnay feqet mi zaf limitê (nimitî). Ay wext eger polîsî kitabê kurdkî kê (kesî) di bitewîştênê kê berdinê. Mi vîrî yeno, yew embazê ma di yew bandê Şivanî tewşîya (tepîşîya), çewres roj siqîyonetîm di,

gozaltî di mend. Qabê yew bandî çewres roj! Ay sebeb ra, hetana ki ma dest a hameynê, na (yan) cawo ki ma telaş ronaynê na cawo ki ma ïzimî ronaynê di ma kitabî limitênê. Kitabê kurdkî tena nê, kitabê tirkî yê ki kurdan ser o yê û kitabê fikrê cepî zî qedexe bî.

-*Persê mi qedîyay. Sewbîna çîyo ke şima biwazî vajî esto?*

-Ayê ki karê weşangêriya kurdkî kenê zanê, neşrkerdişê kitabanê kurdkî bar o. Eyro (ewro) roj eno kar bi fedakarî beno çunkî kitabê kurdkî mesrefê xo nêvejenê.

-*Keyeyê şima awan bo. Ez sipas kena.*

-Ê to zî awan bo. Ma zî sipas kenê.

# SÎMSERKÎS DEWAY MIN A

## Sîyamend MÎRVANÎ

Teyn xo daw' koy, ronîsta  
Hezar ser vêrt, nêwarîsta  
Tim ra tim ti ha mi hîş t' a  
Sîmserkîs deway min a.

Mûn lewûn d' ti yew dew a  
Mûn rezî d' ti vilê mew a  
Leyl-qedri d' astarê şew a  
Sîmserkîs deway min a.

Hardî ti kenen', rûmen'  
Awkay ti ya honik ra şimen'  
Çend bêkesi ba, ti ra nêremen'  
Sîmserkîs deway min a.

Key tu ra kot dîna zere  
Dewij' xo ra nêken gerre  
Tu ra cor berz o kerre  
Sîmserkîs deway min a.

Pali ya beste bi yew nahîye  
Vernî dewi d' hewt sey reye  
Birîyey, mendî du sey keye  
Sîmserkîs deway min a.

Zerey yê ra zaf komil resa  
Şêx Umer, Sofî Temir, Sofî Musa  
Yîn dima na rayer ol asa.

# ANTON ÇEXOVÊ MA Ü ...

## ANTON ÇEXOVÊ MA

Rîpelo ke hîkayeya ey tede weşanîyabî nawit û kovare day destê mamostayî, va:

-Mamosta, hela biewnî ez senî nusena?

Gama ke mamostayî hîkaye wendinî, ey heme bala xo day ifadeyê rîyê mamostayî ser la tu çiyê fam nêkerd.

Mamostayî hîkaye hetanî peynî wende. Hîkaye nêkerdinî panc pereyî la hêna zî mamostayî bi vengêko ciddî va:


-Biciwî! Eke to nêvatinî hîkayeya min a, mi vatinî qey ez yew hîkayeya Anton Çexovî wanena. Ez vana ti benî Anton Çexovê kurdan.

Nuştoxê tezeyî kovare binê çengê xo de pêt şidênay û wina xo ra bawerbîyaye xatir waşt, teber kewt şî.

A roje ra nat seke rasta zî o Anton Çexov bo, êdî bi o çim ewnîya xo ra.

Rojî, hewteyî, mengî û serrî tede şîy la se kerd-nêkerd nêşena hîkayeya dîyine binuso, qet kela ey ro nuştişî nêweriştinî. Rojêk, gama ke êdî ey bi xo zî nêzanaynî ke bîyo çend rey hîkayeya xo weneno, nişka ra şikîya zerrîya ey ke nêbo nezer bibo! Epey fikirîya. Peynî de xo bi xo va:

-Hîkayeya mi hende weş a ke ê bênamusî ez nezer kerda!



Roşan LEZGİN

## FAYDEYÊ KURSÊ ZIWANÊ KURDKÎ

**D**ewlete seba ke destûrê akerdişê kursan ê kurdkî bido, ge va “Berî teng ê” ge va “Nêrdewana şewatî” çin a, ge va “Rengê dêsan weş nîyo” ge zî sewbîn çî kerdê mane.

Û ha ewro abenê ha do meştî abibê, axir Kursê Ziwanê Kurdkî abîy!

Labelê senî ke nê kursî bi hezar teşqele û qîr-qîr û hela-hela û şemate abîy, tam tersê ey çendêk dima ra zî hende bêveng, xo bi xo bêhes gêrîyay.

Seke merdim xo rê hewnê bivîno!...

Înanê ke nê kursî akerdibîy û înanê ke derse daynê, derdê înan tena o bi ke wa kurdî wendiş û nuştîşê kurdkî bimusê. Coka kursîyeran ra pere-mere nêwaştinê, çaya înan zî bêpere bî; la bê ê çend teqawitbîyeyayan û çendnayê ke êdî toleyê sereyê înan qalind bîyo, sewbîn kes nêame.

Û temambiyâyişê yew dewreyî ra dima, xora êdî kursî zî padîyayî.

Belê rast a ke kurs de zaf çî nêameynî musnayîş; alfabe, wendiş, nuştîş û tay xususîyetê bingeyêni yê ziwanî ameynî musnayîş. Xora, na merhele de nê çî zî bes bîy.

Gelo hemeyê kurdan nê çîyî zanaynê? Ez sond wanena ke ney! Ney, reyna ney! Ti alfabe, wendiş, nuştîş û tay xususîyetanê bingeyênan ê ziwanî ra fek verade, zafê înan êdî nêzanê bi ziwanê xo qisey zî bikerê. La hêna zî bê ê çend teqawitbîyayeyan kes nêame.

Her perîyodî di saetî dewam kerdinî. Nêm saete derse, dima ra pancêş deqîqeyî teneffus, hêna nêm saete derse û pancêş deqîqeyî teneffus; peynî de zî nêm saetêna derse û paydos.

Goreyê fikrê mi, her kurd da-des rojî biameynê nê kursî, bes bi.

Eke kurdî biameynê, qet nêbo ka xo rê wendiş û nuştîşê ziwanê xo bimusê.

La ney! Bê ê çend teqawitbîyeyayan û çendna kesanê ke êdî toleyê

sereyê ïnan qalind bîyo sewbîna kes néame!

Nê çend kesê ke ameynê kurs, ez hemîne yew bi yew şinasnena. Eke merdim raste vajo, ameyîşê kursî amey la şêlê ïnan ra bellî bi ke êdî ne ê hişî ne ê kişî bîy! Seba ke xo rê wextê xo vîyarnê ameynê.

Înan ra tayê sîyasetçiyê verênî bîy. Hişê ïnan gramer nêgirewtinê la tam wextê derse de xo mîyan de kewtinê mîyanê munaqeşeyanê sîyasîyan. Xora seba munaqeşeyan zî hezar mane peyda bîyînê.

Embazanê ke derse daynî, seba ke ïnan ra ciwanêr bî, neçar cayê xo de vindertinî û goşdarîya munaqeşeyanê ïnan kerdinî. Eke hayî ro rewşa xo bîy û vindertî xora vindertî, eke nêvindertî, hetanî ke zengilê paydosî ginaynî piro û êdî derse qedîyaynî dewam kerdinî.

Welhasil ïnan bi no qayde kursê xo temam kerd...

\* \* \*

Çend mengî badê ke nê kursî padîyay, rojêk mi yew qewexaneyê Dîyarbekirî de çend teqawitbîyayeyê ke o wext ameynê kurs dîy. Mi hol zanaynî ke êdî bi nê merdiman ne dewe bena awan û ne zî bena wêran la hêna zî badê ke ma binêk halê yewbînî pers kerd, mi ïnan ra va:

- Gelo yew faydeyê kursî şima rê bi, yan ney?

Xelîl Xoceyî va:

-Belê. Mi rê yew faydeyê xo yo muhîm bi. Zereyê mi dejaynî. Qandê daruyî ez ro hingimêne koyan gêraynî la mi peyda nêkerdinî. Nara, xeyrê kursî ra mi Celîl Xoce şinasna. Ey mi rê dewa xo ra hingimêne koyan da ardiş. Mi werd, nika ez bineyke baş a.

Mi va:

-Keyeyê Homayî awan bo! Xelîl Xoce, la eke ti néameynî kurs û to Celîl Xoce nêşinasnaynî, ey zî to rê hingimêne peyda nêkerdinî, halê to senî bînî?!

## **LEYÎRÊ NÊ ZEMANÎ**

Leyîranê leglege va:

- Dayê, no halînê ma edim bîyo; ma rê yewna viraze.

Leglege va:

- Lawo, willayî hetanî ke na qine ma wa bo, ma şorin kotî eynî yo.

Leyîran va:

- Ê a game ma rê prîma biherîne!

Leglege tede mende, nêşena çîyekî vajo.

## **PERSKERDENE**

- Selamuneleykum.
- Eleykumselam.
- Ti senîn î, baş î?
- Ez baş a, ti senîn î?
- Ez zî baş a. Babî û dadî, qic-micî senîn ê?
- Ti weş bî, merg ra baş ê.
- Keyfê ïnan senîn o, heme gewz ê?
- Weşîya to, ti weş bî.
- Dat û datizayî senîn ê?
- Hêna ti weş bî, merg ra baş ê.
- Keyfê ïnan senîn o, heme gewz ê?
- Wa dostî weş bê!
- Xal û xalîzayî senîn ê?
- Wa saxî û selametîya dostan bo.
- Keyfê ïnan senîn o, heme gewz ê?
- Şukur Homayî rê...
- Ü êdî keyfê to senîn o, ti gewz î?
- Homa to ra razî bo! De ti vinde, nara ez pers kena: Babî û dadî, qic-

micî, dat û datizayî, xal û xalizayî, ga û pesê şima, biz û bizêkê şima, mî û verekê şima, kergî û dîkê şima, herî û qantirê şima senîn ê, heme gewz ê?

- . . .

## **EZ GULE RA HES KENA**

- To çi rê a gule cira kerde, qey ti gule ra hes kenî?
- Ez gule ra zaf hes kena.
- Ez vana to rê gule boykerdiş zî zaf weş o, ne?
- Ti nêvînenî, boyâ xo çend weş a!
- Baş o. To çirey yew gule ronaya û weye kerda gelo?
- . . .

## **TENA NAME KÊMÎ YO**

- Ti zanî, mi qerarê xo dayo, ez wazena biba nuştox.
- Rasta? Nuştoxiya çiyî, ti wazenî ci binusî?
- Hema ti ci vajî. Ez şena her ci binusa. Hetanî nika bîy çend kovarî û kitabî ke ez wanena. Û mi çend kesê nuştoxi zî şinasnay. Mi panelan de goşdarîya çend nuştoxan kerde û mi ïnan de qisey zî kerd. Ez ewnêna ke nuştoxiye zaf çiyêdo zor nîyo. Çiyo ke ïnan nuşto, ez zî şena binusa...
- A tíya de vinde! Bêguman çiyo ke ameyo nuştiş, êdî zaf kesî û ti zî şenî binusî la esas çiyo muhîm o yo, çiyo ke tu kesî nênuşto ganî merdim binuso, nêke merdim nêşeno bibo nuştox.
- Ney, ney! Ti qet mi mexapêne. Nuştiş qet zor nîyo. Êdî mi qerarê xo dayo, ganî ez binusa û biba nuştoxêko zaf namedar.
- Qey ti nênuşenî, kam nêverdano?
- Ti zanî? Mi hema xo rê yew name peyda nêkerdo, coka.

## *Vlate* \_\_\_\_\_

- Haa, name! Yanî nazname, mexles?
- Belê. Ganî ez zî xo rê yew nameyo weş bivîna, dima ra do bivînê ke nuştoxiye senîn a!
- Ê mi winî nêbi. Verê cû, mi çend nuştey nuştî. Mi waşt ke ez bişawa rojnameyî rê la o wext mi cesaret nêkerd ke ez bi nameyê xo yê rastikênî bida weşanayîş. Ti zî zanî ke o wext kesî nêaftaraynî bi nameyê xo yê rastikênî binuso. Îşkence, zindan! Û hetêk ra zî, ez bineyke egzîstansîyalîst a...
- O ci yo?
- Egzîstansîyalîzm, yew ekolo felsefî yo. Yanî, xo xeliqnayîş...
- Esgantalîst o, çik o? A game ez zî bena o!
- De baş o. Binuse, ti zî bibe nuştox. Qey do cayê mi teng bo?
- Name, name zaf muhîm o! Ez kena nêkena nêşena xo rê yew name peyda bika. Eke mi xo rê yew name peyda kerd, do xo rê camêrdan bivînê. Xeyrê xo rê, ti zî seba mi ro yew nameyê weşî bigêre ha. Eke to dî, mi ra vaje.
- Wa bo, çiman ser!

# LUYÎ Û HER

Huseyîn BURKE

Luyî şina verî herî  
Kenî di-hîrê qal-xeberî.  
Vûna: Vergî ma nêgeyrenî  
Ti nêşikenî heq ra bêrî?

Her vûnû: Ez yew feqîr a  
Ti meûnî ez gird a, pîl a  
Tehsilî mi çînîk o  
Ez yew qerecahîl a.

Wir dî müşewri kenî  
Dek-dûlab virazenî:  
-Ma ïn vergî fin yew dûmi  
Teslîmî dewijûn kerî.

Verg qurnaz o, yemûn o  
Dûmê luy û hêr tamûm o  
Cî r' yew kindir lazim o.  
Luyî vûna: Ez şina ûno.

Luyî kindir erd d' rakena  
Hêrî ser a qeldena  
Vûna: Ti xu meleqni!  
Ez derzi virazena.

Her vûnû: Îna nêbeno.  
In guri sênî beno?  
Ez ha itya qeldîyayî  
Verg yenû mi erd di weno.

Luyî vûna: Mereq meki.  
Ez çi vaj', sey mi biki.  
Ti gueşî xu wak luyî ser ni  
Çew nêşiken çik tu biko.

Ez verg ra vûna: Her merd o.  
Mi pişto, derzi kerdo  
Xu paşa n', ber' verî qulî xu  
Tu û qijan ra pîya zêd o.

Luyî şina verî qulî vergî.  
Gueşî verg' tik i, derg i.  
-Wak luyî, ti xeyr ümeyea  
Tu mi rî ardî çend kergî?

-Mi tu rî towey nêardo.  
Herî mawo boz merdo  
Goştî yi teze wo, wes o  
Hûnî yo verî derî d' erd d' o.

Şîya m' dew ra kindir ardo  
Mi pişto, derzi kerdo  
Bîye ma şu, xu darî, bîyaro  
Hima k' çewî nêberdo.

Verg vûnû: Ez şini herî úni  
Merdo, tê nêmendo gûni  
Min û lîrûn mi r' çend ruejî besi  
Hima çewî nêberdo.

Verg û luyî şinî verî derî  
Ho uca celêk herî.  
-Bira şu, ver ra ma berî  
Tu û lîrî xu pîya buwerî.

Verg verî herî d' vindeno  
Kindir xu mil ri keno  
Vûnû: Wak luyî in girûn o  
Ez çarnen, berz nêbeno.

Her cayî xu ra wirzeno  
Verg pa daliqyeno  
Verî xu dûnû hetî dew a.

Verg erd ra kaş beno  
Nêzûn se kir', şaş beno.  
Her vûnû: Vên dîn muxtarî!  
Mi ardû yew dişmeno.

Dewijî pîyeser yenî  
Îfadê vergî gêni.  
Vûnî: Tu zaf bîz-mîyeşnê werdî  
Ma heq yin tu ra gêni.

# WERÊAMEYÎŞÊ MARÊ QOLÎ

Mehmûd NÊŞITE

**M**êrdek şefeq ra amebi mîyanê erdê korekî, korek aw dêne. Erdê korekî gelek bi. Varozî (\*) ey ra vatibî “ewro dora to ya, ti eşkenî hetanî şan sey zerrîya xo korekê xo awe dî.” Awe zaf bî. Merdêkî zor dêne xo vatêne ha yela-ha yela ez awdayîş korekî leze biqedêni û nêkewî tarî. Leze kerd, êre (yere) de awdayîş qedêna û huyeyê xo eşt kiftê xo ser, da ser rayîrê keyeyî.

Dewa ey, erdê ey ra bi lingî saetêke dûrî bî. Rayîrê dewe, yew şiverey bî. Tayê cayan de rast, tay cayan de zî pal, kendal û kaş bi. Nêm saetêk ra pey, waşt hem boyâ xo bido hem zî yew cixara bianco. Senî serê yew qilî ra qelibîya û kewt yew raste, şî serê yew kerra de nişt ro, qutîya xo ya cixara vete û yew cixara pişte. Cixara yan nême bibî yan nêbîbî kema verê ey ra marêko bejî vejîya û ame rayîrî ser.

Çimê mîrdeki senî gina marî ro, cixara destê xo eştê û bi dimê huyeyî ra, na dima. Marî senî famî mîrdeki kerd, xo şidêna û leze kerde. Nat û wetê rayîrî ra, mîyanê kem û leman de remayêne, mîrdeki zî bi huyeyê destê xo nêne dima. Mar çiqas remayêne mîrdek dima ra nêvisiyayêne û fek ey ra veranêdayêne.

Marêko gewr û belek bi. Hema-hema qasê dimê huyeyî derg bi. Kerdêne-nêkerdêne mîrdeki fek ey ra veranêdayêne. Mar se ra remayêne mîrdek ey dima bi. Rey-rey ke mîrdek nêzdî ey bîyêne, sereyê huyeyê xo şanayne ey la mar zî gingilê dayêne xo ra û xo huye ra pawitêne.

Mîrdek pa wa zeliqîyabi. Mar dişmen bi, o zî rastê dişmenê xo amebi; ganî işê dişmenê xo bidîyêne. Marî leze-leze xo nêdayêne dest. Can şîrin bi. Werîbînan demêko derg û dila çarna-çeperna. Demêk ra pey,

---

(\*) varoz: Dewan de, keso ke programê dora awe virazeno û awdayîşê baxçeyan taqîb keno.

mar rastê yew qule ame. Senî çim gina qule, keyfê ey ame, xo bi xo va “ez xelisiyaya”. Verê xo da a qule û xo qule ra kerd war.

Mêrdek ewnîya ke mar xo qule ra keno war şino, hema huyeyê xo na hewa û pey ra şana ey. Îlama Homayî rê sereyê huyeyî qey nêgina boça marî ro! Sereyê huyeyî ke gina boça ey ro, boçe qasê di vincewî, govdeyê ey ra visiyê. Govde qulike ra şî, bi vîndî; boçe zî teber ra çend rey erziyê hewa û cil da xo, badê bî serdin, cay xo de bî sey qırşêk û mende.

Mabêr ra tenê wext víyart. Rojêke o mérdek û birayê xo pîya amê miyanê erdê xo yê korekî. A roje, hetanî a saeta ke mérdek awdayîşê korêkî ra agêrabî dewe û raştê marî amebî, reyna o wext işê ïnan qedîya û agêrê dewe. Reyna ê qilî ra qelibiyê û semedê ke yew cixara biancî niştî ro. Qutîya cixara vete û cixara pişte. Hema nêweriştibî o maro qol ïnan de vejîya.

Xora badê ke boça marî tera (cira) bîbî, marî çend rojî nêeskabi qule ra vejîyo. Ê rojanê ke qule de bi birînê ey zaf dejayêne. Ne şewe ne roj hewn nêkewtêne çimê ey. Tim nalayêne. Nêeskayêne “boça” xo tado. Wexto ke a “boça” xo nata-weta tadayêne zî birîna ey ginayêne derûdorê qule ra, reyna gonî bîyêne û yew sancî o girewtêne, vatêne qey erd û asmên ey ser de yenê pê. Her wexto ke nê dej û tewan víyartî. Birîna ey hêdî-hêdî bîne weş. Roj bi roj dorûverê birîne ameyêne pêser. Peynî de çîkêkê birîne nêmend. La boçe êdî bîbî qole. Hinî (êdî) boça ey sey verê cû iş û kar nêdiyêne. Rey-rey sey verê cû waştêne werzo boça xo ser û keyf bikero la kerdêne-nêkerdêne nêeskayêne. Yan zî waştêne boça xo seydê xo wa bilefêno ke ey bifetisno, nêeskayêne. Ey zî fam kerd ke bi na boça qole êdî heqê çiyê newînan (inasarênan) ra nêno û bi na boçe cu zor û zehmet a.

Hetêk ra cu bîbî zor û zehmet hetêk ra zî mar bibi maro qol. Hem maranê bînan hem zî kerm û kêzî ey ra vatêne “Maro Qol”. Rey-rey zî pê xergêlê xo kerdêne. Kamo ke raştê ey biameyêne bi a leqame venga ey dayêne. Na leqame zorê ey şîne. Hetêk ra ê dejî ver hetêk ra zî heqê werdê xo ra nêameyîş û xergêlê kerm û kêzî ra kerdêne ke gêj bibo. Wexto ke nê çiyî ameyêne vîrê ey, çimê ey bînê sûrî û roj bi roj dindanê xo ê mérdekî rê seqênenêne.

Wexto ke birîna marî bîbî weşe û qule ra vejîyabi rîyê erdî ser, ê mîrdekî dima gêrayêne. Semedê ke ê mîrdekî bivîno û heyfê xo ey ra bigîro, bibi muraya gonî. Aye ra, ê derûdorî ra xo kîst a nêdayêne. Timûtim o rayîr de bi û çimê ey şarî -ke uja ra şînê û ameyêne- ser o bi.

Senî çimê ey gina ê mîrdekî ra, verê keyfan ra kerd ke bifirro labelê dima keyf û şayîya ey bî hêrs û xem. Çimê ey bî sûrî, yew hîddetî o girewt, derhal seke biperro ïnan ser, gala her di birayan kerd.

Her di birayan nêzana se bikerî. Her yew cayêk a rema. Peynî de her di kewtî rayîrî ser û ver bi dewe şî. Birayo pîl o ke boça marî qol kerdibi vernî de, birayo bîn dima, remayêne. Mar zî ïnan dima bi. Qederêk bi no tewir da tê ver. Badê marî pil da xo ra, erziya birayê qijî ser; yew gaze daye çaqê ey ro û çend jehrê ey bi, heme verada canê ey. Pededayîşî ra pey mar bi keyf agêra şî. Birayo qij zî ca de gina war, erd de mend û bî bara-bar û cara-cara ey. Birayo pîl ewnîya ke birayê ey ho erd de bareno, çend hebî kerreyî girewtî û ro birayê xo ame. Gava ke resa birayê xo, mar şibi, bibi vîndî; bira zî piştî ser o, erd de bibi kolî. Reng ey de nêmendbi, bibi zerd, zerd sey şima.

Birayê pîlî bi ci zor û ci qeyame hetanî ke xo resna dewe êdî ruh birayê qijî de nêmendbi. Ne ax ne waxî ne zî çînayî ruhê ey nêçarnêne. O êdî bibi qurbanê birayê xo. Marî, birayê qatilê boça xo ra heyfê xo girewtbi.

Şarê dewe sey urf û edetê xo meyît şit, berd gorristan de defin kerd.

Êdî mar û o mîrdek bîbî dişmenê yewbînan. Mîrdek heyfê birayê xo dima gêrayêne. Mar zî, kela ey biney niştibî la zerrîya xo rehete nêkerdibi. Hema zî ê mîrdekî dima bi. Ci wext ke çim ginayêne boça xoya qole ra, o mîrdek ameyêne vîrê ey. Mîrdek zî kamcîn roje çim ginayêne gorrê birayê xo, mar ameyêne vîrê ey. Mabêñ ra zaf rojî vîyartî la dişmentîya ïnan nêvîyarte. Rojêke mîrdekî xebere şawite marî rê, va.

-Ma na dişmentî xo mîyan de wedarîn û êdî kiştişê yewbînan dima nêgêrîn. Bêre ma werê bêrîn.

Marî cewabê ey da va:

-Hetanî ke ez biewnî boça xo ya qole ra û ti biewnî gorrê birayê xo ra, ma do senî werê bêrîn!

## VAJE

Ercan SARIÇİÇEK

Ez bîya nêweş wertê cayî de  
Bira tebîb, rey bê nîyade  
Zerê mi de zaf êş esto  
Çare çin o, ti rey nîyade

Lolo tebîb, vaje, vaje  
No çi derd o zerê mi de  
Adir bi kile kewto canê mi  
Mi veşneno, nêmê şewe de

Wa no sir bo, wertê ma de  
Kes çin o, der-dorê ma de  
Ez merdene ra nêtersena  
Wazena bimirî hardê ma de

Lolo tebîb, vaje, vaje  
No çi derd o zerê mi de  
Adir bi kile kewto canê mi  
Mi veşneno, nêmê şewe de

Karê felekî, karo kor o  
Welat mi ra gelek dûrî yo  
Tersena ke na dolime  
Felek serê Ercanî buro.

# ASTAREYÊ DAYE RÛYÊ ASMÊNÎ DE NÊMÊNDÖ

Akman GEDİK

**S**ewêde tarî û serdine bîye. Şewêde payîzê peyênî. Vare (vewre) varêne. Cemê şodirî ra nat dest kerdibî ci, varêne. Ver bi (ver va) muxurbê (mexrebê) şandî nêvinetibî. Ray û dirbî bîbî qapat. Lemboyê zuzaqî (kuçeyî) tayîna (hîna) melul veşêne. Her ca sipî asêne. Vare derûdormeyî teslîm guretibî. Koyî, deştî, şaristanî, dewî binê meyata vare de bî.

Amika Xasgule amey verê pençereyî. Destê xo na sereyê xo ser, teber de nîyada. Muxurb bî. Çimî çim nêdîyêne. Varayışê vare dewam kerdêne. Çiyê nêasêne. Soba kolîyan (îziman) ser de şorba nîskan pociyêne. Amika Xasgule koçika darêne gurete xo dest, şorba tew dê û tamê daye (aye) de nîyada. “Şorba pocîya” va xo xo de. Çimê xo şîy saeta dîwarî ser. Mêrde û lajê daye qet nîya (wina) herê (berey) nêkewtêne. “Se bî, ci bî?” va xo xo de.

Demeyê ra tepîya tepe-tepa keyberî (çêverî) ameye. Amika Xasgule çapik-çapik şîye keyber kerd ra. Mêrdeyê daye bî. Kincê xo vare ra şanitî ro (roşanay). Amika Xasgule bi (hebe) vengêde berz û hêrsin pers kerd:

-Kanê lajek nênen? Kanê Serhedê mi?

-Mi qet nêdî ewro. Ez hay rê ci nîya, va Ap Seydalî.

Rûyê Amika Xasgule bî tal û tirş. Xonça nê ro. Şorba arde, lewe de kî (zî) di nanê sacî nayî xonça ser û tekit şîye verê pençereyî. Destê xo eşt bi sirota (alışka) xo û pençere de nîyada. Xof kot zereyê daye. Binê çiman ra qayîtê mîrdeyê xo bîye. Çimê xo oda ra carnay. Qayîtkerdişê (ewnîyayışê) xo çapik remna, reyêna teber de nîyada.

Ap Seydalî nanwerdişê xo xelisna û uşt ra. Cêbê (tûnika) çakîtê xo ra qutîya cixareyî vete. Tutunê Mûşî yê xasî ra jû (yew) cixare pemit. Cixareyî ra qilmêda girane gurete.

-Tew lo, tew lo! Bîyo nêmeyê şewe, lajek néamo; keyfê Seydalî Begî de nîyadêne, va Amika Xasgule.

Ap Seydalî bi vengêde barî û nermî va:

-Kênê (çênê), kênê, tawa (teba) nêbeno. Belkî keyeyê (çê) jû hevalê xo der o. Merek meke. Hela şodir bo, ma xebere gênîme (cênîme).

-Hay lo lo, hay lo lo Seydalî Beg! Ti henî rehet vaje çiyê nêbeno. Xortî vanê eskerîya dest no her çî ser. Vanê jonta (cunta) wa. Tern û huşk têmîyan de veşeno.

Ap Seydalî ver bi odaya rakewtene şî. Xeberdayışê Amika Xasgule, eke hesna (heşna) kî seke qet nêhesno, henî (winî) tekit şî. A tayîna hêrs biye. Uşte ra, zereyê oda de şîye a sere û amey na sere. Çend kolîyê bînî ardî eştî bi soba. Pençere de reyna nîyada. Vara kambaxe (kamaxe) hona nêvinetibî. Şîye dîwanî ser o nişte ro. Çimê daye pençere de, goşê daye keyber de bî. Saetî vêrdênenâ ra labelê lajê daye hona nêamebî. Vinike şanitêne çimanê daye. Xo de şiyêne, xafsla kilê sereyê xo dêne. Eke heşar bîyêne çimê xo girs-girs kerdêne ra. Nîyadêne ke a teyna wa reyna. “Mevaje nê însanî kulî pîya hewn der ê yan kes zê (sey) mi esto ke hona heşar o”, va xo xo de.

Bî şodir, Amika Xasgule çar çimî nênayî wereyî. Şîye odaya rakewtene, mîrdeyê xo kerd heşar, va:

-Lajek néamo Seydalî! Berxê mi, Serhedê mi néamo!

A game de jûyî, zeke (seke) keyberî bişikno henî da bi keyberî ra (ro). Ap Seydalî şî keyber kerd ra. Di polîsî û jû bekçî bî. Polisan ra jûyî bihêrs Ap Seydalî tan (nuske) da û kerd xo ver. “Odaya Serhedî kamcîn a?”, va.

Qayîtê oda bî û peyne ser ameyî. Polîsê rûsipeloçikî bêçika xo hejnê (têşanay) û va:

-Ma de bê. Lajê to vizêrî sevetanê (seba) jû ifadeyî ra ame pêguretene labelê ewro şodir xo esto dare.

Oda Amika Xasgule û Ap Seydalî ser a cêreyê. Amike destê xo kerdî girmikî û dê bi sereyê xo ra. Ze kerga ke sere visîyo, bî pirte-pirta daye û xo kerd berz da bi hardî ra. Rûyê xo rêç kerd, rûyê daye gonî û gonîşan ra nêasa. Zereyê oda de bî qêrrî, bî sîn û şîwan.

Der û cîranî ameyî. A taxe de kulî xeberdar bî. Polisan Ap Seydalî

guret berd. Amika Xasgule xo vîndî kerd, balmış bîye. Cenîyan pîyaz ard pirnika daye ver, herme û doşê daye mîştî dayî; arde rê xo.

Ver bi perojî Ap Seydalî û çend polîsan cenazaya Serhedî gurete amayî. Taxa cêrêne de reyna bî şîn û şîwan. Bermayîş (berbîş) ra rûyê asmênî bî di leteyî. Amika Xasgule bi gamanê giranan şîye serê cenaza. Destê lajê xo guretî zereyê lapa (lepê) xo. Destê bêgoşt û barî. Rûyê Serhedî bîbî çequerê lîmone, bîbî zê temezîya serê cenîyan. Çend cenî ameyî Amika Xasgule urznê ra û lewê cenaza ra berde.

Nêzdîyê cemê şandî cenaza defin bîye. Her kes şî keyeyê xo. Mordemanê Amika Xasgule ra di cenîkê porsipîyî mendî. Bermayîş ra hîstîrê dîne bî zuyayî. Amika Xasgule berde kerde cile.

A ke kewte ra, Serhed kewt hewndê daye. Verê jû banî de ronîştî bî. Pejmurde bî. Kincanê dê (ey) ra feqîrîye varêne. Jû kerxur rûyê asmênî de peyda bî. Zê qerqeşune şeqitîyêne ra, amêne verê dîwarî de dînê bi sereyê Serhedî ra, reyna bîyêne berz. Perrê xo hîra-hîra kerdêne ra, reyna xo bi Serhedî guretêne. Nîya çend defeyî bî berz û ame bi Serhedî ser. Peynîya peyên de çimê dê kî vetî. Rûyê dê, kincê dê, her cayê dê gonî bî. Serhed qêrra va: “Dayê, nê kerxurê gonîwerî çimê mi vetî!” No qêrrayîş de Amika Xasgule heşar bîye. Di cenîkî kî bî heşar, şî daye rê awe (axwe) arde. Kulîne duwayê (duayê) ke zanêne wendê. Destê ìnan şî lewanê ìnan ser, venga pîr û rayberan da; reyna kewtê cile.

Amika Xasgule timûtim nîya hewnê xirabî dîyêne. Bejna Serhedî ya zê fidane, çimanê daye ver ra vînd nêbîyêne.

\* \* \*

Rojê şarî hesna ke Amika Xasgule xo eşto dare. Der û cîranî bî top. Ciwanikanê (cuwanikanê) porsipîyan va: “Astareyê daye rûyê asmênî de nêmendo. Şîya bîya meymanê lajê xo.” Berde, kîşa mezela Serhedî de defin kerde.

Vanê di gulê çequerî orteyê mezelan de benê berz, mangeyî şonê guilan ser ra surfnenê wenê; gulê çequerî ancîya xo kenê newe hertim.

# TEMBELÎ Û PASSÎFÎ ÇÎYÊ HOLÎ NÎYÊ

*Roportajkerdoxe: Yekta H. OKÇU*



Muzeyene û Yekta H. Okçu

**M**uzeyene merdimêka saf humanîst a. Bi çend serrî ke ma yewbînî şinasnenê. A Dîyarbekir de raybera kênayanê bêkesan, medxuran û muhtacan a. Muzeyene mîyanê cinîyanê kurdan de yew modela xas a. Mi no roportaj par (2005) serê aşma adare de aye reyde kerd la hetanî nika derse û wendişê mektebî ra qet fîrsendê mi nêbi ke ez kaset ra binusî. Erey kewt. Axir peynî de Roşan Lezgîn hawara mi de ame. Sey her game deşîfrekerdişê kasetî de zî redaktekerdiş de zî mi rê zaf ardim kerd. Ez ey rê sipas kena. Seba ke mi roportajê Muzeyene erey visto, ez hêvî kena ke a do quşûrê mi ra nêewnîyo.

*Yekta: Muzeyene, to rê zehmet nêbo, ti eşkena xo seba wendoxanê kovara ma Vateyi bida şinasnayîş?*

Muzeyene: Ez Çolîg ra wa. Con ra, key şêxon ra wa. Namê babê mi Şêx Muhemed o, namê dayê mi Yildiz a. Dayê mi begleronê Hêni ra wa. Ez ïnkey ita, Dîyarbekir de manen. Ez û dayê xo û way xo ita manenî. La ez Çolîg de omîya dinya. Ez Çolîg de bîya pîl. Wexto ke ma qij bî, mîyonê aîle de yew gure dayne her kesî dest, vatêñ wa bimus gure. Keynan, cinîyan nexş û deştiş kerdêñ. Mi zî meraq kerdêñ, ez hema zaf qijkek bîya, mi meraq kerdêñ. Mi goştarî kerdêñ, yin vatêñ “weta şo!” la mi hendêna zaf meraq kerdêñ.

Dewe de baxçey ma bî, çeşît-çeşît darî tede bîy. Ma balkone de roniştêñ, çewî werre kerdêñ temaşe bikero. Zaf darî tede bîy. Mişmişî, vişney, kírazî, erîgî, say, miroy. Ez zaf şîn serê daran. Ez mîyon baxçan de bîya pîl. Ez serê siway rew wuriştêñ şîn serê daran.

*Yekta: Ti qet dare ra nêkewtêne war?*

Muzeyene: Nê, ez nêkewtêne war. Ez şîn serê daran, mi fêkîy xo çînayn, ez amên war. Serê siway rew, hema ke her kes hown de yo, ez wuriştêñ, şîn serê dara en berze, mi fêkîy xo çînayn. Ez amên war, şîn mîyanê baxçey, mi sebzey xo çînayn; ez omeyn ke hema hê hown de yê. Baxçê ma de xizmekarê ma xebetyayn la fêkî ma zî çînayn, rencberan zî çînayn. Di hebî berê baxçey ma bî. Ma fêkî û sebzeyonê xo ra dayne şarî la rencberî qayîl nêbîne, seke kîsey yin ra şino. Ez tim rew wuriştêñ. Mi areyî kerdêñ hedre, aîle hema wuriştêñ werdêñ.

*Yekta: Baxçeyê şima mîyanê dewe de bî?*

Muzeyene: Belê. Namey dewê ma Herra Gewr bî. Ha hetê binê Conî de, Awkê Hemamon uca ra şina. Awkê Xeydî zî yena kuwna mîyan, bena ro. Dewêka şîrin a. Dewêka hêşîn a. Peyê dewe de zî ko esto. Herra koyî sipî ya, gewr a.

*Yekta: Ti nika deştişê kincan ser o, modelê kincan ser o, nexşan ser o, viraştişê xemlûxêzî ser o xebitîyêna. Nê warî de ti malim a, ti derse dana. Ti nê hunerî ça ra musaya?*

Muzeyene: Mi nê çî verî ra viraştêñ. Mesela ma vatêñ “çeqme”, ïnkey bi tirkî vanê “tel kırma”. Çeqme de, hema vace ke nê welatî de reya

verêne mi sey malime derse daya. Verê cû ma viraştên, aîley ma viraştên. Sêm ra, şîfon ra viraştên. Zaf beriqiyêن, şewq dayn. Miyanê aîley ma de, her cinî xeyalê xo gore çî viraştên. Her kesî xo ver o, goreyê xo ra yew desen vetên. Eno qenewîç bi, dantêl bi, tewir-tewir nexşî bî, aksesuarê bînî bî; xo ver o viraştên. Onîyên çîçege ra, onîyên pel ra, dare ra, yan zî çîyna ra, viraştên. Ez niştên ro, mi goştarî kerdên. Ez şîn, mi zî xo ver o viraştên. Yew rey min keyney apê xo ra modelê nexşî waşt, nida mi. Ez şîya mi baxçe ra yew vila beybûne arde -bi tirkî vanê “papatya”-, mi nay xo ver, min û wayê xo ma nexşê aye viraşt. O wext ma hamnanan şîne Çolîg, zimistanî zî omeyne Dîyarbekir. Yew musabeqa nexşan vîraziya. Ma bi o nexş yew xelate gurite. Qîymetê a xelate sed dolar kerdên. Mudirê Kultur û Turîzmî yê Dîyarbekirî xelate day ma.

### *Yekta: To mekteb wendo?*

Muzeyene: Mi diplomay mektêb verên û mîyanêن û lîse, heme teber ra, bi îmkanê xo guritî. Înkey zî ez unîversîte de, îlahîyat de wanen. Ez teber ra, yanî “açık öğretim” de wanen.

Ti zî zana ke mîyanê şarê ma de, edetê ma de zaf qîymet danê lajan. Aye gore, heqê cinîyan vîn bêñ. Yanî gerek ma enaye qebul bik ke her ca de comêrd vernî de yo; keye de, kar de, gure de, mîyon cemâtî de, şarî mîyon de, her cayê heyatî de comêrd vernî de yo.

Howt dewê ma bîy. Reya verêne ez Haccayîr de şîya mektêb. Ez çend rojî şîya la ma agêray, hêna şîy Herra Gewr. Şes serrî qedîyê, babê mi qey lajê xo dewe de mekteb da viraştiş. Kîsey xo ra arazî da, mesref kerd, mekteb ard dewe. Ez şîya mekteb de qeyd bîya la hîrê rojî badîna o qeyd ame sîlkerdiş. Malîmî ra va “Ya bîya pîl. Howt serrî ra vîyarta, bîya yewndês serrî, senî yena mekteb?!...” Mi yew nuşte dîyn, mi vatêن “Dê hela biwanîn, qalê çitayî keno, vano se?” Badê cû Herra Gewr de kursê wendiş û nuştişî abi. Şan de şîyn. Tam çowres rojî pêro cinî şî nê kursî. Ez zî şîya. Ü tirkî zî, verê cû ra, ez radyo ra musaybîya. Radyoyê Erziromî bi, radyoyê GAPî bi. Mi zaf radyo goştarên. Zemon tede şî, eynî radyo de, “Radyo GAP” de ez vejîyaya, mi program viraşt. Wexto ke ez vejîyaya programê radyoyî, ez hetêk ra mehzûn bîya hetêk ra zî mi bi xo iftîxar kerd. Mi va “Ya Rebî! Ez kûmca ra omeya kûmca?”

Ez derhêq wendîş û nuştîşî de, derhêq musayîşî de vana ke “Çiyêk erey çin o”. Merdim her wext eşkeno bimuso. Waştiş muhîm o.

*Yekta: Program derbarê çiyî de bi?*

Muzeyene: Program derhêq karê nexşon, derhêq xemlûxêzî de bi. Yanî çiyê ke cinî bi keda destê xo anê meydon, çîyo mehellî. Ü program derhêq nê gureyî de bi ke, ma senî eşkên cinîyanê muhtacan rê, bêkesan rê ardim bikerin. Cinî û keyney ke mîyon aîle de tehdâ vînê, ê ke bêkes û bêomid ê, ma senî eşkên yin biançin mîyanê heyatî? Ma senî eşkên yew gure, yew kar bidin yin, problemanê yin hel bikerin? Bi no qayde yew program bi.

*Yekta: Nê gureyê nexşan û viraştişê xemlûxêzî tena ti keye de musaya yan to cayê de perwerde dîyo?*

Muzeyene: Ma ke omey Dîyarbekir, ez şîya mi muracatê “Halk Eğitim”î kerd. Hîrê serrî ez şîya kurs, hewte de 30 saetî. Uca ra mi sertîfika guret û ez bîya malim. Eno kursê nexşan bi. La senetê karê destan (el işi), ez keye de musaya. Bi des serrî ke nê her di senetan de ez derse dana. Heta ïnkey mi sertîfika day 280 heb telebon. Mi 280 telebe perwerde kerd. Nê kûm ê? Nê heme muhtac ê, bêkes ê; ê ke dewan ra koç kerdo, omey Dîyarbekir. Heme problemê yin êst, heme mexdur ê. Ê ke sêwî mînd, ê ke nişken debara xo bikê.

*Yekta: Nika ti “Halk Eğitim” de derse dana?*

Muzeyene: Înkey ez hem Mudirîyetê Kultur û Turîzmî yê Dîyarbekirî (Diyarbakır Kültür ve Turizm Müdürlüğü) de derse dana hem zî Weqfa Kultur û Dayışşinasnayışê Dîyarbekirî (Diyarbakır Kültür ve Tanıtma Vakfı) de derse dana. “Halk Eğitim” de zî mi derse dayne. Keyney ke mi derse day yin, enê sazgehan ra hem teşwîq guretên, yanî hem pere guretên hem zî derse û sertîfika guretên. Peynî de, bi sayeyê ena xebate, zaf cinî û keyney ke hezar û yew problemê yin êst, mexdurê kulturî yê, mexdurê aîle û edetan ê, sosyalize bîn. Mesela, ti ownêñ ke birayê aye ha unîversîte de wanêñ la wayê xo mexdur kên. Yanî, çelişkîyê ecêbî êst. Bira tehdâ way xo rî keno la o keynan de geyreno.

Nê keyney hem kurs de senet musêñ, hem zî çimê yin abêñ; ownêñ ma ra, şinê qeydê xo mektêb de virazêñ, şinê qeydê xo mekteb mîyanêñ de virazêñ, yanî “açık öğretim” de wanêñ. Wendiş û zanayîşê xo aver

bên. Îmkanî kuwêن destê yin. Wendişê xo avêr bêن.

*Yekta: Nê çiyê ke şima kursan de, atolye de virazenê, şima nê xemlûxêzan kamca roşenê, senî roşenê, kam herîneno? Şima heqê emegê xo tam gênê yan ney?*

Muzeyene: Aye de problêm êst. Yanî, îtya Dîyarbekir de bazar çin o. Hema newe-newe bazar virazîyeno. Ma zor-zehmet roşen. Ma zaf emeg danê, ma bi henday heskerdiş û zehmet nê çîyan onê meydon la ma zehmet roşen. Semedo ke bazar zaf çin o, heqê keda destanê ma tam nikuwn dêst ma.

*Yekta: Çiyo ke şima virazenê, çiyê otantîk ê. Rastî na ya, gerek turîstî, kesê ke huner ra hes kenê bîherînê; yanî xîtabê her kesî nêkenê.*

Muzeyene: Rast a. Cayo ke turîst êst, bazar zî esto. Ma zî xîtabî yin kên. Tenya Dîyarbekir de ney, ma wazêن bazarê her cayî ra îstîfade bîkêr. Esas gerek hunerê verênan rê, senetê kehin rê, her ca de, temamê dinya de her kes wayîr vejîyo. Mese-la kulav, yanî "keç", kûmî dêne xo ra? Şiwanon, ê ke şîn verê heywanon. Yan zî keye de vistêن ra. La ïnkey, hema newe-newe bazarê kulavî virazîyêno. Înkey kulav Tirkîya de, dinya de hol rexbet vîneno. Ê ke xususiyetê kulavî zanê, hem kên dekorasyon hem zî xaseten ê ke tede nêweşîya romatîzma, nêweşîya kirêcleme esta, bin de danê xo ra, tedawî bêن. Kulav ra çontey cinîyan zî raxbet vînên.

*Yekta: Sîparîş danê şima?*

Muzeyene: Cayon de sergî vîrazîyêن. Walîtiya Dîyarbekirî xeber dona ma, destek dona ma. Heqê şîyayîşî, heqê otele dona. Ma şîn nê sergîyan, yan zî ma çiyê xo şawêن sergîyan. Bajaranê Tirkîya, heta ke dewletanê Ewropa zî şinê. Ma çiyê xo şawitê Almanya zî.



*Yekta: Weqf, walîtiye wa beste yo?*

Muzeyene: Ney, sîvîl o. La walîtiye destek dona, beledîye destek dona. Wezaretê Kulturî zî destek dono. Zaf cay destek donê.

*Yekta: Nê keyney ke yenê kurs, yanî telebeyê to, madem ke keye de mexdur benê, senî aîleyê ïnan destûr danê ke bêrin kurs?*

Muzeyene: Aîley ke mi vînên, ê ke ez şina keyê yin, bêteredut keynanê xo şawên. Eke badê kursî, yew ca de kar bibo, mesela sektorê taybetî de -sey sekreter yan zî gureyêna bibo-, eke ez bawer bikî ke gure pak o, ez aîle ra vana, qebul kên. Vanê “Xoce, eke ti vana, temam o”. Zaf bawerîya xo bi mi onê.

*Yekta: Eke winî yo, ti aîleyê heme telebeyanê xo reyde dîyalog de ya, ne?*

Muzeyene: Tabî kî ez aîley heme telebanê xo de dîyalog de ya. Ez ciya-ciya problemanê yin goştarena. Derdê xo mi rê qisey kên.

*Yekta: Miyanê hende merdimanê mexduran de, ti muxatabê problemanê ïnan bena; gelo psîkolojîyê to senîn o?*

Muzeyene: Ewilî ez zaf qehrîyên. Qey ena viron (bêkinc) a, qey fiston enaye çin o, qey eno problemê a bîn esto? Heqê reyî tedit çin bi, mi dayn. Heqê qeydê mektêb tedit çin bi, mi dayn. Mi ke zaf goştarî kerdên, tay bîy ke eno hetê mi suîstîmal kerdên. Ez bêhown mendên. Badê mi fam kerd ke eno çî şas o. Heta ke ez zerrê xo veşnena, ez destek bibî hîna hol beno. Ez reye (rayîr) bimocnî, cesaret bidî, moral bidî, destek bidî heta ke linganê xo ser o vindên. Nika terzê mi eno yo ke ez vana “Wa ne cinî comêrdî rê bibo bar û ne zî comêrd cinî rê bibo bar. Wa her kes bi qewetê xo bawer bo, wa xirabî ra, xiraban ra derse bigîrîn û wa holan zî xo rê bikîn model.” Nika ez ke rakuwena, tenya ez vana “Kaşka mi ena nivatên, mi ena bivatên”. Merdim gerek tim muhasebeyê rojê xo bikero, eke ney, şaşî eynen dewam kên. Ez ci rey zengînî û zengînan xo rê model nigena. Kultur û medenîyet û insanîyet bala mi ancên.

*Yekta: Ti telebe û aîleyanê telebeyanê xo reyde bi kamcîn ziwanî qisey kena?*

Muzeyene: Willey ez raşt vajî, ma zaf tirkî qisey kên. Kurmancon kurmanckî caverdaya, zazayon zazakî caverdaya; ma zaf tirkî qalî kên. La hêna zî, ez ke şîya yew keyê kurmancon, eke ê kurmanckî xebêr bidê, ez zî kurmanckî xebêr dana; zazakî xebêr bidê ez zî zazakî xebêr

dana. La ma zaf tirkî xebêr danê.

*Yekta: To qet bi kirdkî (zazaki) çiyêk wendo, ti eşkena kirdkî biwana?*

Muzeyene: Roşan Lezgînî yew kitab hedîye da mi. Mi bineyke wend ez nişkawa biwana. Mi da way xo, way mi biney wend.

*Yekta: Wendişê kirdkî de to rê çi zehmet o? Ti fam nêkena?*

Muzeyene: Ez fam kena. Ez fam kena la ê herfê ke tirkî de çin ê, mi rê zor yên. Ez nişkena biwanî. Tay kelîmey êst, ez fam nêkena. Kirdkîya ê, kirdkîya Çolîgî nîya. O semed ra zehmet beno.

*Yekta: Kirdkî tena ê Çolîgî nîya, zaf cayan de kirdkî esta.*

Muzeyene: Ez zana. Kirdkî Gêl de zî esta, Hêni de zî esta, sowbîn cayon de zî esta. La kirdkiyê Çolîgî deha rehet a, hîna etud kerda. Ez îna vana.

*Yekta: Ti qayîl a ke kirdkî bibo ziwanê mekteban, bibo ziwanê rojnameyan, televîzyonan, wendiş û nuştîşî?*

Muzeyene: Ez qayîl a ke wa merdim verî xo bişinasno, wa medenî bo, wa her kes yew gure de kar bikero, wa vêşan nébo. Ez her wext vana, ez keyan de vana. Keyney ke yenê kurs, ez biranê yin ra vana, ez her ca de vana ke “Tembelî û passîfi çiyê holî nîyê”. Kirdkî bena, kurmanckî bena, wexto ke bî ziwanê tîyatroy, bî ziwanê filman, deha weş fam bena. Yanî, nuştîş zor o; her kes néwaneno. La tîyatroy de, film de, sînema de, hîkayonê eşqî de, kilamon de, muzîk de ziwan deha weş fam beno. Ez îna vana, eno fîkrê min o.

*Yekta: Ti merdimêka hol a, fîkrê to zî hol ê. Seba nê roportajî ez to rê zaf sipas kena.*

Muzeyene: Ez zî to rê zaf sipas kena.

## RENCBER EZÎZ



Seyîdxan KURIJ

Rencber Ezîz, yew dengbêjo çewlîgij o. O, keso verên o ke mintiqê Çebaxçûrî de sey yew hozanî modernî deyîrî kirdkî (zazakî) vatî. Ci heyf ke heta ewro zî kesî cayî ey denikerdo. Bi munasebetî na deyîra cêrêن (Şûno Şûno), ez wazena bi kilmkî Rencber Ezîzî bidî sinasnayîş.

Rencber Ezîz 01.01.1955 de, dewê Çewlîgî Wusifan de ameyo dinya. Nameyî eyo resmî Aziz Berdibeg o. Ezîz derguşê xo de, wexto ke hemâ yew tuto qij o niweşîyê çiman geno.

Bêdoktorî ra bi metodanî prîmitîfan tedawî beno. Tedawiya xelet ver, yewserre beno ke çimanî xo keno vîndî.

Babî Ezîzî eynî serr keyeyî xo bar keno beno Çewlîg. Ezîz, Çewlîg de mehlayê Derê Qeseran de beno pîl. 1968 de dest pêkeno dersê Quranî gêno û çend serrî de beno hafizu'l-Quran. 1971 de binbilerzê Çewlîgî de dadîyê xo keno vîndî.

1972 de Ezîz şino İstanbul û uca de Mektebî Mewlidxaneyî Çemberlîtaşî de wûneno. Eynî serr Mektebî Cemîyetî Koran de wendîş û nuştiş museno. O, nê cemîyetî de dest bi xebatê muzîkî keno. Yew mudeto kilm de cenayîşî sazî museno û bi embazanî xo ya vejîyeno turneyan û konseran dûno.

O wext Tirkîya û Kurdîstan de yew perr ra xebata sîyasî ya welatperweran rûmitîyen, perro bîn ra zî dewlet û faşistanê sîvilan hêriş (gale) kerdiyen welatperweran ser. Rencber Ezîzî hêzanî welatperweran het de cayî xo geno û dest pêkeno besteyanî xo virazeno.

Tayê besteyanî Ezîzî yê verênan de tesîrî Aşıq Îhsanî, Aşıq Mahzunî û êb. ayseno la o tayê deyîranî kirdkî (zazakî) zî vûno. Û serra de, Ezîz bi xo deyîranî xo yê kirdkî virazeno. Şîiran zî nuseno û muzîkî nînan o bi xo virazeno. La ge-ge şîiranî Mehdî Özsoyî (Şêx Mehdî Özsoy) zî besta keno û vûno.



Rencber Ezîz saz ceneno

Rencber Ezîz semedê xebatê xo ya muzîkî 1977 de tepîşîyeno, hewt aşmî û new rojî hepisxane de mûneno. 1978 de hepisxane ra vejîyeno û yeno Çewlîg. Ezîz, Çewlîg de zî xebatê xo dewam keno. Çimî ey kor bî la o hertim cemâtî welatperweran de bi. Şorişgêrî Çewlîgî yê serekeyî embazî ey bî. Ezîzî suhbetan de çi goşdarî bikerdiyen, sey teyîb girewtîyen. Çîyo ke şorişgêran ra musaynî, şînî şarî rî qalî kerdîyen. Ey hema-hema her bîyayeyî Çewlîgî yê muhîmî ser o yew besta viraşta.

Rencber Ezîz peynîyê 1978 de şino Almanya û heta mergî xo Almanya de mûneno. Ezîz, 31.07.1988 de, bajarî Almanya Bremen de xo yew bînaya berz ra erzeno war û bi no hewa mereno. Heta ewro zî sebebî mergî ey tam bellî nêbîyo. Yew deyîrê xo de, xo ser o wina vano:

“Ezîz lawikûn vûn  
Lawîk weş î  
Vêng Ezî imo zafîn gueşî.  
Ezîz, lacî Filît Dorêşî  
Wê Ezo, wê Ezîz o!  
Nîye pîs o nîye temîz o!  
Şarî r' wisar o, tu r' payîz o!”

Ezîz, Almanya de xebatê xo hêna profosyonel rûmeno. Ewropa de şewanî kurdan de vejîyeno sehne.

Ey zaf besteyî kirdkî, kurmanckî û tirkî viraştî la tena yew kasetî ey vejîyo. Nameyî kasetî ey “Hesreta Azadî” yo. Nê kasetî Ezîzî bi taybetî mîyanî çewlîgijan de zaf eleqe dî. Hema zî zafî çewlîgijan nê deyîranî Ezîzî ezber ra zûnî û nê deyîrî fek ra fek vajîyenî. La zaf besteyî Ezîzî yê ke nê kasetî de çin î zî estî. Ey zaf rey embazanî xo het saz dawo piro û vato, embazanî ey zî vengî ey bi metodanî primîtîfan girewto kasetan. Nê kasetan ra çend teneyî kewtî ma dest.



Semedo ke nê deyîrî vîndî nêbî, ez wazen ma ïnan ra tayê deyîran Vate de vejî. Nê deyîran ra yew zî “Şûno Şûno” ya. Ezîz, na deyîr hîrê welatperweranî çewlîgijan ser o vata. Hem vate hem zî besta aîdê Ezîzî ya. Nê hîrê kesî zî embazî Ezîzî bî.

Serranî 1980 ra heta ewro na deyîr bîya sey yew deyîra anonîm û mîyanî çewlîgijan de vajîyena. Semedo ke sey yew belgeyî tarîx de bimano, ez wazen ma na deyîr Vate de vejî. No munasebet a ez wazen nê hîrê heme welatperweranî erjîyayan ser o zî çend rêzan binusî û nînan reyna bîyarî vîrî şarî ma.

## ŞÛNO ŞÛNO

Şûno, şûno, bira şûno  
 Şûno, şûno, heval şûno  
 Tîj vecîyaya gilê kûno <sup>(1)</sup>  
 Bî teq-teqê tifingûno  
 No dem, demê delvergûn o <sup>(2)</sup>  
 Bî piç-piçê cîrûnûno  
 Adir kot zerrê daykûno  
 Şûno, şûno, bira şûno

Îdrîs şûno, Cîhat şûno  
 Şakir şûno, bira şûno  
 Ez bermenô, şima r' vûno

Xeber amey xebera pîs  
 Cîhat' dima kişîya Îdrîs  
 Hevalî ma yê marksîst-lenînîst  
 Şûno, şûno, bira şûno  
 Ez bermenô, şima r' vûno

Şûno, şûno, keko şûno  
 Adir kot zerrê daykûno  
 Derd' hevalûn derdo girûn o

Faşîst bî yo <sup>(3)</sup>, vecîyay texto <sup>(4)</sup>  
 Heval Şakir girot berdo  
 Ezîz vûno "kurd cûmîyerd o"  
 Şûno, şûno, bira şûno  
 Şakir bira avûkatî pêşmergûn o

1. *gilê kûn*: gilê koyan, tîtikê koyan, nîçikê koyan

2. *delverg*: deleverge, verge (verga makî)

3. *bî yo*: bî yew, yew bîy

4. *vecîyay text*: vejîyay serê textî, bîy wayîrê iqtidarî

Şûno, şûno, keko şûno  
Bira şûno, heval şûno  
Ez bermenô, şima r' vûno

Az û Puex, Şabûn û Mîyalûno (5)  
Bîyarîyen topûn-tifingûno  
Bidêñ destûn pêşmergûno  
Wa bigîr qesas' hevalûno  
Şûno, şûno, bira şûno

Îdrîs şûno, Şakir şûno  
Cîhat şûno, bira şûno  
Ez bermenô, şima r' vûno

Pêşmergê ma guîn biwazî  
Pey perûn' qul' nêbî razî  
Vac "Şakir, Cîhat, Îdrîs hê çâ yi?"  
Şûno, şûno, bira şûno  
Derd' şima, derdo girûn o

Şûno, şûno, heval şûno  
Adir kot zerrê daykûno  
Ma gên qesas' hevalûno.

---

5. Az û Puex: Çewlîg de nameyî di mintiqayan û di eşîran o.  
Az, Şabûn, Mîyalûn: Çewlîg de nameyî dewan o.

## CİHAT ELÇİ

**C**ihat Elçî 1954 de Çewlîg de ameyo dinya. 1973 de uca Mektebî Maliman (Bingöl Öğretmen Okulu) qedêna û bi malim. 1977-1978 de Anqara de, Enstituyî Perwerdeyî (Eğitim Enstitüsü) de wend. Wexto ke bi şehîd dewê Çewlîgî Qadimadrag de malim bi.

Cihat Elçî 1973 de bi endamî (üye) PDKT (Partîya Demokrat a Kurdîstanî Tirkîya). Cuwa pey zî 1977 de mîyanî KUKî (Kurdistan Ulusal Kurtuluşcuları) de cayî xo girewt û xebata xo ya sîyasî dewam kerd. 1974 de awankerdişî “Bin-Genç”î (Bingöl Gençlik Derneği) de û TÖB-DER de zî aktîf ca girewt.

Cihat Elçî yew xorto jîhatî, zanaye, egît û cesûr bi. O se yew xorto aktîf mîyanî çewlîgijan de zaf ameynî heskerdiş. Tesîrî keyeyî Elçîyan û şexsen ey Cihatî Çewlîg de zaf bi. No rid ra o bibi teli kewtibi çimanî dişmenî. 19.09.1977 de, yew şan Çewlîg de, 30-40 faşîstan dorûverî Cihat Elçî û di embazanî ey (Hîlmî Aydoğdu û Ahmet Timuroğlu) girewt. Hîrê heme welatperwerî zî bî birîndar. Darbê Cihat û Hîlmî giran bî. Nînan darenî we ke berî nêweşxaneyî Xarpêtî. 20 km. nêşinî, rayîr de Cihat ganî xo teslîm keno.

## İDRÎS EKİNCÎ

**İ**drîs Ekîncî 18.02.1949 de Çewlîg de ameyo dinya. Keyeyî Mala Mewludî ra yo. Dayîreyî Awankerdişî yê Çewlîgî (Bingöl Bayındırılık Müdürlüğü) de sey teknîkerî xebitîyên.

İdrîs Ekîncî endamî PDKT bi û şehîdbiyayîşî Cihat Elçî ra pey Çewlîg de bi mesulî partî. İdrîsî, Kongreyê PDKT ya 1977î ra pey, xeta newê (KUK) de cayî xo girewt. O, hem semedê xebatê xo ya sîyasî hem xebatê xo ya mîyanî karkeran, hem zî mucadeleyî antî-faşistî ra qandê (qey) dewlet, îstîxbaratî û faşîstan bibi yew hedefo muhîm.

Weçînayîşî (seçimî) 1977î de, MHP (Milliyetçi Hareket Partisi) ra Hîkmet Tekinî qezenc kerd û bi serekî beledîyyayê Çewlîgî. O wext, bi nameyî MİSK (Milliyetçi İşçi Sendikaları Konfederasyonu) yew sendîka estibî. Na sendîka giredayî MHP bî û Xarpêt de hêzdar (biqewet) bî.

Hîkmet Tekinî waştîyen bi ardimî faşîstanî Xarpêtî na sendîka Çewlîg de zî bikiro a û karkeranî beledîya bikiro endamî naye. No semed ra Xarpêt ra, serekî MİSKî Xarpêtî Komando Receb zî tede, xeylêk faşîstî amey Çewlîg.

No deme de Çewlîg de beyntarê faşîstan û şorişgêran de lej (qoxe) vejîya. No rid ra 15 şorişgêrî tepîşiyay. Edlîye û beledîya yew bîna de bî. Roja bîn nê embazî ganî bivejîyên mehkeme. Faşîstan planê xo viraştibî, xo kerdibi hazır, beledîya de ameybî pêser. Faşîstan waştîyen wexto ke şorişgêrî serbest veradîyay ìnan pîyerune pîya bikişî.

Îdrîs Ekîncî û çend embazî xo şî ke hem nê şorişgêran rî werd berî hem zî ìnan bipawî (qori bikirî). Wexto ke Îdrîs û embazî xo kewenî qatî beledîya, faşîstî zereyî beledîya ra dabûnce nanî Îdrîsî ya. Embazî ey, ey gêni benî war û benî nêweşxane la Îdrîs nêxelisîyêno, 17.01.1978 de beno şehîd.

### ŞAKIR ELÇÎ

**S**akir Elçî 1946 de Çewlîg de ameyo dinya. O lajî Cemal Elçî yo. Keyeyî Elçîyan xanedananî Çewlîgî ra yew keye yo. 1936 de, wexto ke Çewlîg bi nameyî “Bingöl”î bi bajar, Cemal Elçî bi serekî verênî beledîyayê Çewlîgî.

Şakir Elçî 1965 de Fakulteyê Huquqî ya İstanbulî de qeydî xo viraşt. Wextî wendişî xo de kewt mîyanî xebata sîyasî. Xortanî kurdan 1969 de İstanbul de DDKO (Devrimci Doğu Kültür Ocağı) awan kerd. Şakir Elçîyi zî mîyanî awankerdoxan û komîteyî idarîyî DDKOyî de cayî xo girewt.

Şakir 1970 de Fakulteyê Huquqî qedêna û bi avûkat. La o darbeyê 12ê Adarê 1971î de tepîşîya. Mehkemeya Îdareyê Orfi ya Diyarbekirî de (Diyarbakır Sıkıyonetim Mahkemesi), tewrî (bi) roşnvîr, welatperwer û şorişgêranî kurdan a ame mehkemekerdiş. Şakir Elçî endamî PDK-T (Partîya Dr. Şivanî) bi. O, semedê çalakîyanî DDKOyî ame mehkemekerdiş. Nêzdîyî di serrî û nêm hepisxaneyî Diyarbekirî de mend. Bi efi, 1974 de hepisxane ra vejîya.

Şakir Elçî 1974 de Çewlîg de dest bi avûkatî kerd. Yew şexsîyeto

karîzmatîk bi. Hem hetî sîyasî û hem zî hetî mehelî ra, se yew avûkat persanî şarî Çewlîgî de zaf eleqedar bi. Ey ferq nivistîyen mîyanî fraksîyonan û pêroyê şorişgêran rê avûkatî kerdîyen. Nê xususîyetanî ey ra, xortan û şarî Çewlîgî Şakir Elçî ra zaf hes kerdîyen.

Ey 1975 ra pey zî embazanî xo yê verênan het de cayî xo girewt û xebatê xo ya sîyasî, mîyanî Partîya Karkeranî Kurdistanî (Kürdistan İşçi Partisi, KİP) de rûmit. Na partî mîyanî şarî de sey DDKD (Devrimci Demokratik Kültür Derneği) ameynî sinasnayîş. Ney ra Şakir Elçî zî Çewlîg de sey yew DDKDyî ameynî sinasnayîş.

Payîzî 1978î de, serekî beledîyyayê Çewlîgî Hîkmet Tekin rayîrî Dara Hêni ser o kişiya. Wayê Hîkmet Tekinî, Dara Hêni ra Umer Axayî het de bî. Înan va ke “Her çî keyeyî Hecî Cemalî ra vejîyeno. Pîlî şorişgêran Şakir Elçî yo”. Yew mudet cuwa pey, lajî Umer Axayî, Mîthat Dopdoğruyî, 3yê adarê 1980 de çarşîyê Çewlîgî de Şakir Elçîyo avûkat şehîd kerd.



# BIBO ZÊ VERÎ

**Heydo KEÇANIC**

Xo bierzê Kalê Xizirî  
Dinya bibo sey verî  
Tern û huşkî pîya meveşno  
Zulimkarî teynîya bero.

Laj û çêna kifşe nîya  
Pî yû maye jû nîya  
Na dinya fanî ya  
Zewqê xo ra dînsiz bîya.

Xo bierzê Kalê Xizirî  
Dinya bibo sey verî  
Tern û huşkî pîya meveşno  
Zulimkarî teynîya bero.

Çiman ra nênen hêşirî  
Bimuse zê verî  
Nas bike pîr û rayberî  
Hewarîye bike Xizirî.

Xo bierzê Kalê Xizirî  
Dinya bibo sey verî  
Tern û huşkî pîya meveşno  
Zulimkarî teynîya bero.

Mi dîyî cem û cemâtî  
Şîrin sey şekirê nebatî  
Pîrê mi vetî kirametî  
Mewzuat dîyêne kaînatî.

Xo bierzê Kalê Xizirî  
Îmdadê Heyderî de şêro  
Tern û huşkî pîya meveşno  
Zulimkarî teynîya bero.

# NÊZANAYÎŞÊ ASNAWE

Hebûn OKÇU

**M**i sinifê şesine qedênabi û qarnê xo zî pa teqdîrî girotebî. Mi yew tatîlê hamnanî weş heq kerdibi.

Hamnanî germê Dîyarbekirî ver merdim nêşkeno dayax bikero. Germî ver şar Dîyarbekirî terk keno. Yan şinê verê çeman yan zî şinê cayanê tatîlî. Cayê tatîlê ma zî dewê ma ya. Ma şinê dewê kalê min. Namê dewê kalê min Barav a.

Barave, yew dew a ke dar û ber ra kewe ya, mîyanê koyan de ya. Hîrê mehlê xo estê. Namê mehlanê ci: “Dîyarê Sawe” yan zî “Berxîg”, “Sizêrin” û “Sunzêre”. Barave de darê fêkîyan zaf ê. Darê fêkîyan ê yabanî zî zaf estê. Ayrîca tede çesît-çesît zebze esto, baxçeyî tede zaf ê. Bi eno şeklê xo Barave zê cemetî ya. Awê çemê Barave anî weş herekîyena ke însan bianyo awe ra tede heyran maneno. Mîyanê çemî de kerrey zê zerdî bereqyenê. Rocêke min û babê xo pîya verê çemî de ma xo rê ê kerran ra arêday. Mîyanê ê kerran de yew estibî, eynî zê îskeletê sereyî bî. Eka ez nêzana babê min a kerra pê se kerde.

Mîyanê çemê Barave de tayê cayan de golê xorîy estê. Kiştê enê golan de kerreyê xişnî estê. Binê enê kerran de zî masey estê. Gama ke masey binê kerran ra vecîyenê, binê tîce de paştê îne zê sîmî bereqênê. Goştê enê masan zî zaf weş o.

Gama ke ma şî dewe, rojêk ez û hevalê xo ma şî verê çemî. Ma nan, sole û torre zî xo dir berdî. Min û hevalanê xo ma qasê xo ra masey qefelney. Ma adir kerd we. Ma eştî serê adirî. Mîyanê vengê wîç-wîça mîrcikan de ma lingê xo kerdbî mîyanê awe û ma xo rê masey kebab kerdêne, werdêne.

Wext hame nîmeyê rocî. Dewê ma de eno wext zaf germ bîne. Ma zî kewtêne mîyanê golanê çemî. Cayo ke mi xorînîy ci nêzanêne ez nêkewtêne mîyanê gole. Mi asnawe nêzanêne ya! Hevalê min ê dewe, pêro kewtêne mîyanê çeman. Gama ke kewtêne mîyanê awê çemî,

mîyanê xo de xo rê henekî kerdêne û awe pernêne yewbînî. Gama ke awe hewa ra bî, tîce dayne awe ro û keskesûre tede virazîyayne.

Ez zana ke awe de senî keskesûre virazîyena. Mi mekteb de, dersê *Fen Bilgisi* de wendibi, ez uca ra musawa. Gama ke tîce hewa ra gine-na awe ro, roşnê tîce mîyanê awe de şikîyeno. Eno şikîyayîşê tîce de heme rengî têmîyan de eysenê û verê çimanê ma de keskesûre virazîyena.

Hevalê min kewtibî gole la ez xorînî ra tersayne. Hevalê min dewe ra bî, îne weş asnawe zanayne. Şîne serê zinaranê xişnan û zê masan xo eştêne mîyanê awe. Rey-rey bi henekî îne ez zî kaş kerdêne mîyan gole, cayo xorîn. Mi xo mîyanê destanê îne ra feletneyne.

Kiştê golêk de yew kerraya xişne estibî. Serê ena kerra kevzin bi. Areyêke ez şîya serê a kerra û xo rê ronişa, mi temâşeyê awe kerd. Seyîn bi, ez eka zî baş nêzana. Seyîn bi se, ez serê kerraya kevzine ra şeqetîyaya û nişka va mi xo mîyanê xorîniya gole de dî. Mi va ya, ez asnawe nêzana. O wext hevalê mi zî gole ra vecîyabî û serê qûmê verê çemî de xo rê kay kerdêne. Hetanî eka ez ci rey bi eno qeyde nêkewtibîya panîk. Mi pêru qewetê xo top kerdibi û mi destê xo berdêne-ardêne. Sereyê min seyîn mîyanê awe ra vecîyayne ez qîrrayne. La reyna sereyê min şîne binê awe. Fekê min akerde bi, awe şîne mîdeyê min.

Reyke sereyê min mîyanê awe ra vecîya û ez qîrraya. Ez fetesiyêne. Sereyê min mîyanê awe ra seyîn bivecîyayne, ez qîrrayne. Fetesiyayîş seyîn o, ez eka daha weş zana.

Hayî hevalanê min dinya ra çinî bî. Ez çiqas qîrrayne zî veng nêşîne kesî. Enerjîyê min qedîyêne. Ez reya peyine qîrraya. Çimê min bî tarî. Ez vana qey vengê min şibi hevalan...

Serê qûmê verê çemî de, qîrrayîşê hevalan hame goşê min. Wexto ke mi çimê xo kerdî a, ez newe ra hamebîya dinya.

Ez vana qey emser tatîlê hamnanî de ez reya dîyine hamîya dinya.

Dîyarbekir, Payîz 2005

# XWI ZÛNEYÎŞ

## Newzat VALÊRÎ

Merdimo mequl, xwi zûnû  
Cahîl suhbet nizûnû  
Cahîl xwi alîm zûnenû  
Ay ra qalûn toş vûnû.

Însûn pê îlm ben' însûn,  
Bê îlm û hîş niben' însûn  
Eger zûneyîş çîni b'  
Kem mûnen, niben însûn.

Her çî xwi yoyî ra mevaj'  
Kês ra sirrûn xwi mevaj'  
Her kês xwi r' tim dûst mevîn'  
Hîn bê hîş qalûn mevaj'.

Însûn nibeno bellî  
Şito kal werdo, vûnî  
Hol bûnî dormaley xwi  
Hem merdî estî hem namerdî.

Manîsa, Agustosa 2003

# HÎKAYETÊKE ŞÊX SEDÎ

Arêkerdox: Serdar ROŞAN

**H**îkayetêke Şêx Sedî (\*) ya weşe esta. Vano: Zemanêke de padîşahêke barê (hetê) ma de bi, di cinîyê ê bî. Cinîyêke ê, ceykew bi esil ra bî, esilê ya pak bi; husnê ya çinî bi. Cinîya bîne, aîleykew bê esil ra bî, husnê ya zehf bi. A bêesile, di lacê ya benê û ena ku esillî ya lac û keyneyêke ya benê. Padîşah zî zehf ay lacanê cinîya bêesile ra hes keno. Çunkî ê wir (her) dî li daye şiyê, weskek ê, kêfê ê îne rê zehf yeno. Feqet ena cinîya ke bi esil a, lacê ya ra ende hes nêkeno. Vano husnê ê zêde niyo. Eno lacek û way xu daîreyêke de yê, enî wir dî bînî zî qarşî îne de, koşkêke bîne de yê.

Rocêke padîşahêke esker -des hezarî esker- gêno, serê bajarê ê de yeno. Meydanê qarşî bajarê ê de çadiranê xu nano ro û ê ra herb wazeno. Padîşah veyn deno wezîranê xu, top keno, vano: “Eno padîşah ma ra herb wazeno, quwetê ma çinîk o. Quwetê ma panc hezarî ancax bibo, quwetê ê des hezarî yo. Serê ma de hamewo. Ma se kerê, qarşî enî de?”

Wezîrî vanê: “Padîşahê ma, ma zî şaş ê, ma nêşkenê tu rehîrêke bimocnê to.”

Siraweno wir dî lacanê xu ser ku îne ra hes keno, îne ra perseno, ê vanê: “Wele bayê, ma nêşkenê herb bikerê. Teslîm bibe.”

Vano: “Law, ez teslîm bibî, padîşay zalim ê, go talanê ma berê, go her haway bîyarê serey ma. Wexta padîşahêke şero padîşahêke bînî mexlûb bikero, zehf zilm û hequeretan serê îne de keno. Çareyêke çin yo, ma se kerê?”

Hanêno lacê ê -a cinîya biesile ra-, qarşî pacay ê ro derbas beno. Dano paca ro, lac hanêno bay ê yo, verê xu şaneno daîrey ê, ver bi daîrey ê yeno. Lacek kono zere, vano: “Emir bike bayê!”

---

(\*) Şêx Sedî: Şâîrê Farisan ê namedar Se'dîyê Sîrazî (1213-1292).

Padîşah vano: “Lacê min, enî padîşahî des hezarî esker giroto ma ser de amewo, ma ra herb wazeno. Quwetê ma herbî rê çin yo. Ma se kerê?”

Vano: “Bayê, yan ti go qevdê şimşêrî bidê destê îne, yan zî fekê şimşêrî, bidê destê îne.”

Padîşah vano: “Lacê min, qevdê şimşêrî ci ya, fekê şimşêrî ci yo?”

Vano: “Bayê, qevdê şimşêrî teslîm o; fekê şimşêrî, ti go îne ro dê.”

Padîşah vano: “Lacê min, quwetê min çin yo ku ez fekê şimşêrî bidî destê îne.”

Lacek vano: “Bayê, eger ti musaade bikerê, ti emir bidê destê min, eger Homa hes bikero, ez go qarşî îne de serfiraz bibî. Ez go îne mexlûb bikerî.”

Padîşah vano: “Lacê min, min emir da destê to.”

Ano ewraqan we û wezîrê ê ìmza kenê, emir dano destê ê, ê keno sereskerê xu.

Lacek emir dano, mîyanê bajarî de defê hewarî danê piro -a gave zey zemanê enkay hoparloy-miparloy çinî bî, radyoy çinî bî-, temamê bajarî top beno. Lacek panc hezarî esker bajar ra veceno teber. Fetelêno serê îne de, vano: “Banîrê min ra! Aw ge mergê xu ra terseno, ters pîzey ê de esto, wa ageyro, serbest o. Ez te ra çîke nêvana! Aw ge bi zerê xu yeno, ma go şêrê qarşî enî eskerî de herb bikerê. Çimkî duşmin bêro verê merdimî de dest bierzo malê merdimî, namûsê merdimî, merg însanî rê baştıro zey çîyanê newînân.”

Îne serbest keno. Mîyanê ay panc hezarî ra temam geyrenê a, panc sey heb bi zerê xu barê lacekî de manenê. Lacek vano: “Banîrê min ra! Ez vernîye şima de wa, merg bibo ewil mi rê yo. Şopa ku min da piro, min ra mevisyê; ma go piro dê şêrê, mîyanê sehay herbî de.”

Ê heme vanê: “Belê, emir emirê to, ma teqîbê to kenê. Ma pêro mergî rê zî kiştişê duşminî rê zî hadre yê.”

Enî şinê konê sehay herbî. Bay lacekî wezîranê xu gêno, ay wir dî lacanê xu gêno, diyarêke de, hanêno îne ra. Hanêno lacê ê kono mîyanê eskerî. Seyîn vergêke veşan aşma sibatî bikwo mîyanê pesî, bi ay away kono mîyanê eskerî; des hezarî eskerî pêro cê ra fîneno. Ay ge mirenê mirenê, ay ge manenê remenê.

Lacek herbî qezenc keno, geyreno a. Bay ê yeno vernîyê ê, lew nano

mîyanê çimanê ê wa, zehf tera hes keno, zehf eleqe dano ci; ê beno meqamê xu de dano rûniştişî, şêwr û mişawirey xu bi ê keno.

Enî wir dî biray hanênê barê bay îne de qîmet îne rê nêmend. Şarê îne, xelqê îne, temamê bajarê îne lacekî ra hes kerd; hemine ci rê hurmet kerd. Wir dî xeberî danê, vanê: “Ma se kerê?” Vanê: “Ma go ê û çende hebî pelewananê hevalê ê dawet bikerê kê xu. Ma go bîyarê îne rê nan hadre kerê, goşt hadre kerê. Ma go jehrî bierzê ser, jehrîyo Silêmanî. Eger borê go ca de bîqelebyê. Go çendeyêke bay ma, ma ra biheredyo, tabî ma ewlad ê, go badî reyna aşt bo. Go ma rê bimano. Enî away nêbo, qarşî enî de ma rê qîmet nêmend.”

Wirzenê we pîlane xu virazenê, anê wer kenê hadre. Şirawenê dimay lacekî û di-hîri hebî pelewananê hevalê ê ku jîhatî yê; îne teklîfê kê xu kenê. Lacek vano: “Madem anawa wa, gerçî biray min cesaretê îne çin yo zî, ez go şîrî kê îne de’wetî.”

Şinê. Enî nan kenê hadre. Wexta zehîr erzenê mîyanê goştî qerwaşe vînena. Qerwaşe vana “ez ay lacî ra vacî, etya go qetlîamê îne virazyo, ez bena sebeb; ez nêvana”. Xu diznena, vazdana şina barê way lacekî. Way lacekî ra vana: “Îne jehrî kerda mîyanê goştî! Hînka bîne biray to boro, we û ay pelewanî go pêro bîqelebyê. Ê biray to rê xayîn ê. Awayêke xebere bide biray xu.”


Way ê pacâ kena a. -Pacay îne qarşî jobînan de yê.- Hanêna, birayan birayê ya teklîf kerd, va “bira, rast bê serê nanî”. Seyîn lacek beno ro serê nanî, way ê pacâ nana pa, şîrqê camê pacâ ra veng şino lacekî. Xu ra kişte ser fetelêno, hanêno way ê pey camî ra xu da kişte. Lacek xu serê sînî ra tepya dano. Hevalanê xu ra vano: “Xu pey de bidê!” Ê xu pey de danê.

Biray vanê: “Biray min, bore; ti ci rê nêwenê?”

Lacek vano: “Zehmet o liwe şêrî bido kiştişî, cayê şêrî de hukmê şêrî bikero. Merdimo xaîn go di xaînîya xu de biveyşo. Rew-erey, ci çaxê ke bo go xaînîya xu bivîno.” Hinî (bîney) goşt gêno erzeno verê pisînge, pisînge wena, ca de qelebyêna. Vano: “Şima ende ke xaîn ê, ez eşkena serey şima tera kerî feqet go vacê serey biranê xu tera kerd. Şima ena xaînîya xu de bimanê, hetanî ke şima enî izdirabî de şêrê.” Geyreno a.

Bay ê zêdetir tera hes keno, unwanê paşatî zî dano ê.

## OMID ESTO, HÊVÎ ESTA



Huseyîn Karakaş, Omid Esto,  
Weşanxaneyê Vateyî, İstanbul, 2006,  
65 r.

**H**useyîn Karakaş qezayanê Sêwasî ra Kangal de, yew (jû) dewe de maya xo ra bîyo. Çarêş (des û çar) serrîya xo de şîyo İstanbul. İstanbul de hetê ra karanê cîya-cîyayan de se karker xebitîyayo û hetê ra kî mîyanê faalîyetê sendîkayan û xoverrodayışê karkeran de ca girewto.

Cepgirîya tirkan ra dime mîyanê xoverrodayışê şarê xo de cayê xo girewto. No sebeb ra dekewto hepis û cezaya idamî girewta. Nika zî hepisxaneyê tirkan de yo.

Nê kitabî de hîkayeyê Huseyînî estê. Hîkayeyê ke ey hepisxane de nuştî. Nê hîkayeyanê xo de o behsê cuyê (heyatê) dewijan, kedkaran û yew kurdê binê kîlîtan, yanî yew hepsî keno. Bi ziwanêko weş tekiliyan û derdanê ïnan ifade keno.

Huseyîn hîkayenuştiş de gelek ciraameye yo. Tena bi kirmancî ney, bi tirkî zî hîkayeyî nuştî. Ey seba hîkayeya xo ya bi tirkî, Musabeqaya Hîkaye û Şîiranê Tirkî ya Desine ya Hüseyin Çelebi de xelata dîyine girewta.

Huseyîn rast vano: Omid esto, hêvî esta.

**Deniz GUNDUZ**

## HAL

M. MÎRZANÎ


Rîyê ma bi tarî  
Rîyê ma însanûn  
Şi qefleyê holûn  
Pêşîya vilûn ser  
Derd û keder  
Varûn û laser.

Ma tikûtena mendî  
Sîya ûnt sipîyûn  
Roşnî xo da tarî  
Şi qefleyê yarûn  
Bi wişk rew bi rew  
Dar û sayêr  
Vil û azgilêr.

Dinya bêrehm mendi  
Ûmnûn gêra zimistûn  
Zimistûn bi ûmnûn  
Mirin bi zergûn  
Şi qeflê teyrûn.

Hetî deşt û aw a  
Koyûn û la wa  
Xo dûrî megîr' mi ra  
Bûnî dilê xo ra  
Hîşar bi hinî  
Zulim bestîya ra  
Cûmêrd û cinî  
Umbaz û bira!

## EDEBÎYATÊ MA VILE DANO



Roşan Lezgîn, Halîn, Komal,  
İstanbul, 2006, 107 r.

Halîn, kitabê hîkayeyanê R. Lezgînî yo diyîn o. Seke yeno zanîş kîrmancî newe-newe yena nuştene. Edebîyatê kîrmancî, mavajîme hîna yew domano pîzez o. Eke nê edebîyatî mîyan de cayê Roşanî ra bigêrîme bêguman cayê xo cayêko berz o. Kalîteya

hîkayeyanê Roşanî kalîteya edebîyatê bînan yê dinya ra cêr nîya. Yewna xususiyetê ey, Roşan tena hîkayenuştiş de ney şîrnuştiş de kî (zî) gelek baş o, ciraamaye yo.

Seba ke sînorê edebîyatê kîrmancî ewro teng ê, Roşanî nê kitabî de sey yew hostayî wezîfe girewto xo ser û tamanê neweyan ra, renganê neweyan ra gêrayo.

Ez nêwazena zaf derg kera labelê wazena biney behsê ey bikera. Roşanî heta mektebo verên wendo, yanî çar serrî mektebanê tirkan de perwerde bîyo. Labelê Roşanî wendîş û nuştîşî ra zaf hes kerdo û edebîyatê kîrmancî de cayê xo girewto. Beno ke bi des serran mektebanê tirkan de perwerde nêbîyayîşî, ziwanê ey destê qatilanê kurdkî ra xelisnayo ra. O bi xo yew xebatkar, yew emegdar o. Hetê ra seba debara xo xebitîyayo hetê ra kî bi xo wendo. Ez vana no seba zafine çiyêdo bêîmkan o.

Heto bîn ra, no kitab beno kitabê Weşanxaneyê Komalî yo yewin ke bi kîrmancî çap bîyo. Nêzdîyê hîris serrî yo ke Weşanxaneyê Komalî

esto û kurdan ser o zaf xebatê başî neşr kerdê labelê heta ewro yew kitabê kirmanckî neşr nêkerdo. Bi nê kitabî Weşanxaneyê Komalî xo rê yew bero newe akeno.

Halîn, nameyê hîkayeya peyêne ya nê kitabî yo. Pêro pîya hîrêş hîkayeyî nê kitabî de estê: Wayîrê Zimbêlan, Hêrsê Sitûna Mermere, Tena Estarey Şahid Bîy, Kema Hewirsî, Mergê Yew Kutikê Esîlî, Elametê Qiyametî, Birîna ke Çareyê Mi de ya, Pêrodayışê Kutikan, Perşe, Xayîn, Serkewtena Zerencan, Ziwano Mehellî, Halîn.

**Deniz GUNDUZ**

# RİPELÊ FIQRAYAN

## NAMÊ MI FERZ O

Arêkerdox: İrfan KAYA

**W**extî verî de dewanî Palî ra yew dew de yew axa û yew zî xizmetkarî ey benî. Axa yew merdimo zaf desttepîste bîyo. Ney ra, xizmetkar axayî xo ra lomey kenû. Yew mudeto derg keyeyî axayî de goşt nipêşenû. Xizmetkar dua kenû, vûnû: "Homa bikerû nizdî ra yew axa yan zî yew şêx bîyerû bibû meymanî axayî, belkî o wext axa yew dewar sarebirnû, ez zî xo rî goşt borî."

Beyntare ra yewna mudeto derg vîyereno. Rojêk yew şêx benû meymanî axayî. Axa yew kavir (beran) sarebirnenû. Cinîyê xizmetkarî goştî kavirî pojena. Wextî şûmî, goştî kavirî nona serî yew sînî ya û bena şêxî ver de nona ro. Şêx, qolanî işligî xo ûncenû dîyar û şinû goştî kavirî ser, dest pêkenû wenû. Xizmetkar, peyî berî de vindenû û temasê şêxî kenû. Şêx goştî kavirî wenû. Binêk goşt monenû. Xizmetkar dua kenû, vûnû: "Homa bikerû ti nieşkî pîyorê goştî borî! Ti borî, îşsalah to qirrik de mûno!"

Şêx binêk aresenû, reyna şinû goştî ser. Vûnû: "Loqma peyen werdiş sunet û." Dima zor dûnû xo û loqma peyen zî benû xo fek, sêr tepsî de bê estan teway niverdenû. Dima xizmetkar sofreyî dûnû arye benû zere. Onîyenû bê estan teway nimendû.

Axa veng danû xizmetkarî xo, vûnû: "Suwe awk û legen bîya, wa efendî destanî xo bişo!"

Xizmetkar awk û legen anû, awk keno şêxî dest ri. O destan û fêk xo şuwenû.

Şêx ewnîyenû xizmetkarî ra labelê çimî xizmetkarî tadaye yî. O hêrsbîyaye yo û qeldapey (tewşkanî) ewnîyenû şêxî ra. Dîqetî şêxî ûncenû û xizmetkarî ra pers kenû, vûnû:

-Biko, namê to çina wo?

Xizmetkar vûnû:

-Namê mi ferz û.

Şêx vûnû:

-Hella hella!.. No qayde name ez ha newe eşnawena!

Xizmetkar ca de vûnû:

-Hi... Ez vajî namê mi sunet o ti mi zî borî!

Şêx fehm kenû ke çimî xizmetkarî goşt de mendû. Geyrenû a axayî ra vûnû:

-Axa, çimî xizmetkarî mi de mendû. Qey (qandê) Homayî ti yew dîk sarebibirnî bidî xizmetkarî xo. Nîyû nê, marî ey emşo yenî mi ser û mi wenî.

## WENDOXAN RA

**P**ar menga temmuze de Weşanxaneyê Vateyî, wa weş bê, mi rê tayê hûmarê kovarê Vateyî û çend kitabî rusnayî. Mi nê kovar û kitabî bi keyfweşî ya wendî.

Badê, mi Sînan Sutpakî rê -Hepisxaneyê Elbîstanî de yo- mektube rusnayî û pers kerd ke tede kovarê Vateyî est ê, çin ê. “Tîya de qet teba çin o” vat. Raver fikrê mi o bî ke nême mi rê nême Sînanî rê. Badê mi vat “O yo ke uca de teba çin o, ez hemîne birusnî”. Çi kovarê ke mi dest de bî, mi Sînanî rê rusnayî.

Nê kovaran de di hebî nuşteyê mi zî estbîy. Mi kovara Vateyî rê rusnabî, ïnan zî redakte kerdê û neşr kerdê.

Kovara Vateyî hûmara 25. de mektubêka Sînanî neşr bîya. Vano: “Nuştoxê kovara Vateyî ... Murad Canşadî mi rê hepisdê Bursa ra hûmarê kovara Vateyî (hûmara 7. ra hetanî 24.) riştî.”

Mi şerm kerd, ez kewta binê erdî. Yeno zanitene ke Vate û kovara Vateyî emegê des serran o. Tayê merdimanê hêcayan sereyê xo dejnayo, bi emegê des serran na xebata, na kovare arda meydan. Ez wendoxê na kovare ya. Ciqas ke destbera mi ama, ez kar û xebata nê merdimanê hêcayan taqîb kena, ci ra îlham gêna. Çayê ke, ziwanê ma weş û delal o. Ganî şarê ma heme, nê ziwanê xoyê weş û delalî rê wayîriye bikero. No ma hemîne ser o wezîfeyêko muhîm o.

Ez Sînanî nas kena. Embazêko zerrîpak o. Zerrîpakîye ver, ez kerda “nuştoxê Vateyî”! Heddê mi neyo ke ez xo nuştox bihesibnî. Ez wendox a.

Wexto ke mi cumleya corêne wende, mi vat: “Kaşka (werrekna) kovara Vateyî na cumla redakte bikerdêne.”

Bi silam û hurmet.

**Murad CANŞAD**

Hepisxaneyê Bursa

Ma bexêr Mamosta [Malmîsanij],

Ez her çî ra aver to rê û gurîyayoxanê Vateyî rê silam û hurmetê xo rusnen. Kar û gureyê şima tim zerrîweşî û şabiyena min a. Mi rê eyan o ke tarîxê şarê ma de nameyê kovara Vateyî ebe herfanê zerrnênan êno nuştene.

Mamostayê min o delal! Heta nika mîyarîm tê rî kî haw bî çend serrî ke yewbîn nas kem. Ez bawer ken ke naca nîya pey dêsan de ez çi kar ken, xecelê mi çik o û wextê xo çitûr vîyarnen ti tenê zanena. Çike pêro mebo kî gureyo ke ez naca ken, êno kuno ra to dest. Karê mi, ziwan û edebiyatê şarê ma yo. Mi heta nika çi kar kerdo? Rindî yan kî kêmîya nê karî çik a? Na nuqta de heta nika hevalê min ê xas Murad Canşadî -ez eysîyo pê ke nê rojan nêweş o, Heq canweşî ci dero- ra ber kesî teba krîtik nêkerd. Teyna nuştayê mi nê, yê kesî krîtik nêbenê. Na nuqta de kêmîya kovara Vateyî zaf girs a. Çike şaranê dinya ra kî wanem û vînem ke edebiyat nême ra nême krîtikkerden a. Bê krîtik edebiyat nêbeno, nênuşiyêno. (Mamosta Munzur Çemî -goşê xo biçilqê- ferhengê krîtik kerdbî. Nuştayê xo Vate de veyjîya, mi wend, ez zaf çâ bîyo.)

Ziwanê ma de nuştene senê karêde çetin o, ez bawer nêken ke to ra rind kes bizano. Naye ra hen derga-derg nuştene munasib nêvînen. Labelê ez heta tayê çîyan mevajî kî nêbeno. Çike ez roja verêne ra heta nika to ra û Vateyî ra zaf çî pîn.

Haw bî new-des serrî ez ziwanê ma ser o gureyîn. Pêro pîya bîyay çend teneyî, ez rind nêzanen labelê ez tim hîkaye ser o vineto. Ez hen bawer ken ke nê gureyî de tenê binge kî girewt. Labelê nika hepışxaneyî zê demê verêni nîyê. Mordem nîşkîno çîyê hîra binusno. Tebervetene êzatade giran a. Hetê ra no derd hetê ra kî ziwanê ma xo zere de bîyo hewtay leteyî. Labelê nîya bo kî ez verî ra nat çiqas ke despera (destbereya) mi amê şura (xeta) Vateyî de nusnen. Ez nîya nuştene ca de vînen û ebe nê fîkrî nuştayen ser o vinden. Nuştayê mi çik ê? Çiqas ênê qebulkerdene? Kêmîya xo esta, çin a? Tey xeletîya ziwanî û kêmîya edebiyatî çi duşt der a? Na nuqta de qisa vatene mi rê nêkuna, çike ez nê karê krîtikkerdoxan vînen. Goşê mi Vateyî ser o yo ke sola (mela)

şima mi ra çiyê vajê. Labelê na lige de şima ra kî qet veng nêveyjîno. No nîya rind nîyo. Tengasîya Vateyî kî zaf a. Ez naye kî fam ken û zanen. Ancîya kî lazim o ke ma yewbîn rê piştî vejjîm. Her çî serba ziwanê ma yo. Serba hunerê şarê ma yo.

Hende serrî yo hepisxaneyan de ez rind zanen, kirmancê ma meseleyê ziwanê xo de se de heştay famkor ê. Hedîsa welatbezkerdoxî de omrê xo poynenê labelê ziwanê xo rê kî pirtikê wayîr nêveyjînê. Halê biaqilanê ma ke no yo, şaro bîn ci hal der o pêro pîya ronişîm hem bifikirim hem kî sereyê xo bikum.

Hona ke ama mi vîrî ez naye kî vajerî ke gune yê şarî û domananê şarî nîyo! Guneyo giran, hayê ke ebe nameyê şarê ma siyaset kenê, yê ïnan o. Înan pérune pîya bi serran ziwanê ma xo rê kerd aksesuarê siyasetî. Yewê ke hewes kerd ziwanê ma ser o bigurîyo, o kî da pirnike ro tersna û fist ra dûrî. Nika kî tay vinetê danê zanîyanê xo ro ke “Ma ca (qey) hen kerd!”. Heq kesî şaş nêkero, xora ke şaş kerd kî kaş nêkero.

Mamostayê min o delal,

Hedîseyê ke dej danê zerê mi hen zaf ê ke, ez na mektube de kamcîn bîyarî ziwan û kamcîn mîyarî! To ra wastena mi, nuşteyanê mi rê wayîr vejjî. Nuşteyê mi canê mi ra dilopînê, hen benê hîkaye. Ez girsî dima nîyo. Na hedîsa pêrodayena şarê ma ya. Ko de pêrodayene çiqas ke karê welatî yo, pey nê dêsan de ziwanê ma rê wayîr vejjîyene kî hende karê welatî yo. Ez nîya fam ken, nîya vînen û nîya zanen.

Silamanê xo yê germinan to rê û gurekerdoxanê Vateyî rê rusnen. Bimanê weşî de.

**Huseyîn KARAKAŞ**  
Kocaelî, 25ê tebaxe 2006